

বাংলা এজেন্সী ও আলফা প্রমোশন্স ডিরেক্টর বাহাদুর
কর্কট বিভাগের সমুদ্রের লাইব্রেরী এবং পুরকার
পুস্তকরূপে অনুমোদিত

ইজরত মোহাম্মদ ।

রামপ্রাণ গুপ্ত

বেঙ্গালিরা তত্ত্বপ্ত সঙ্গীত পরিচালিত
মং ১৩২৭
মুদ্রা শ্রুতি লাইব্রেরী
চতুর্থ সংস্করণ

বরদা এজেন্সী,
কলেজ স্ট্রীট মার্কেট, কলিকাতা ।

প্রাণ গুপ্ত

—প্রকাশক—

শ্রীমদেন্দ্রনাথ ঞগু, বি-এস-সি,

৮ বি, রাভেন্স লাল ঙ্গাট,

কলিকাতা ।

জ্যেষ্ঠ,—১৩৩৮

প্রিণ্টার—শ্রীশশিভূষণ পাল,

মেট্রিক প্ৰেস,

১৫নং নরানটাঘ দত্ত ঙ্গাট,

—কলিকাতা—

ভূমিকা

‘হজরত মোহাম্মদ’ ‘আরতি’ হইতে পুনর্মুদ্রিত হইল ।
পুনর্মুদ্রাঙ্কন কালে কিয়দংশ পরিবদ্ধিত ও কিয়দংশ নূতন
লিখিত হইল ।

‘নবনূর’-প্রকাশক শ্রীযুক্ত মোহাম্মদ আসাদ আলী
সাহেব ‘হজরত মোহাম্মদ’ প্রকাশের সমস্ত ভার গ্রহণ
করিয়া আমার কৃতজ্ঞতা ভাজন হইয়াছেন । ইনি স্বতঃ-
প্রবৃত্ত হইয়া ১ম সংস্করণের ভার গ্রহণ না করিলে ‘হজরত
মোহাম্মদ’ কখনও গ্রন্থাকারে প্রকাশিত হইত কিনা
সন্দেহ ।

মহাপুরুষ মোহাম্মদ স্বীয় জীবনে অচল বিশ্বাস,
সুগভীর নিষ্ঠা, কঠোর বৈরাগ্য এবং স্বলম্ব উৎসাহের এক-
শেষ প্রদর্শন করিয়া গিয়াছেন । তাঁহার অলৌকিক গুণ-
রাজি সকলেরই শিক্ষণীয় ও অনুকরণীয় । এই ক্ষুদ্র গ্রন্থে
হজরত মোহাম্মদের জীবনের রেখাপাত মাত্র হইয়াছে ।
যদি একজন পাঠকও এই গ্রন্থ পাঠ করিয়া তাঁহার
গৌরবোজ্জ্বল জীবন অনুশীলনে অনুরাগী হন, তাহা
হইলেই আমাদের উদ্দেশ্য সিদ্ধ হইবে ।

কেদারপুর, টাঙ্গাইল, }
১লা আবেণ,—১৩১১ । }

শ্রীরামপ্রাণ গুপ্ত

বন্দীয়

মোস্লেম আত্মবন্দকে

এই গ্রন্থ

সম্ভাব্যের নিদর্শনস্বরূপ

উপহার প্রদান করিলাম ।

হজরত মোহাম্মদ

“To bring about the restoration of Society to its normal type, the Great Architect of the Universe sends forth from time to time specially authorised messengers to rouse, to stimulate and to lead into the right way, the erring sons of men”—

Blackie's Life of Burns

পয়গম্বর নোয়া সুবিশাল ভূখণ্ডের অধীশ্বর ছিলেন। তদীয় অন্ততম পুত্র সাম (নোয়ার তিন পুত্র ছিল) তাঁহার পরলোক গমনের পর সেই সুবিশাল সাম্রাজ্যের একাংশে আধিপত্য স্থাপন করেন। সামের অধস্তন পঞ্চম পুরুষের নাম যারব বা আরব। আরব পিতার কনিষ্ঠ পুত্র ছিলেন, এ কারণ পিতৃরাজ্য পরিত্যাগ করিয়া এক স্বতন্ত্র রাজ্যের প্রতিষ্ঠা করেন। তাঁহার শাসনাধীন দেশ তাঁহার নামানুসারে আরব নামে প্রসিদ্ধ হয়। আরবদেশ

হজরত মোহাম্মদ

অনুর্কর ও বালুকাময় মরুস্থলীতে পরিপূর্ণ। পুরাকালে এই রুক্ষ-দৃশ্য দেশের অধিবাসিগণ সাতিশয় স্বাতন্ত্র্যপ্রিয় ও পরজাতিদ্রোহী ছিল। এক্ষণে পার্শ্ববর্তী দেশ সমূহের সঙ্গে আরবদেশের ঘনিষ্ঠ যোগ সংসাধিত হয় নাই। ইহার ফলে, আরবদেশ সুপ্রাচীন হইয়াও সভ্যতা আলোক লাভ করিতে অসমর্থ হইয়াছিল; বহুকাল পর্য্যন্ত অজ্ঞান-তিমিরে আচ্ছন্ন ছিল।

আরব জাতি

খ্রীষ্টীয় ষষ্ঠ শতাব্দীতে আরব জাতি সভ্যতার অতি নিম্নস্তরে অবস্থিত ছিল। এই সময় আরব জাতি বহু সম্প্রদায়ে বিভক্ত ছিল। এই সকল সম্প্রদায় স্ব স্ব প্রধান ছিল; একে অন্যের আধিপত্য স্বীকার করিত না। প্রত্যেক সম্প্রদায়ের জন্ত স্বতন্ত্র অধিপতি ছিল। তাঁহারা বংশানুক্রমে শাসনকার্য্য পরিচালন করিতেন। কিন্তু প্রজারঞ্জনই অধিপতিগণের প্রভুত্বের মূলভিত্তি ছিল। শাসনকার্য্যেও তাঁহাদিগকে প্রজার পরামর্শ গ্রহণ করিতে হইত। কোন বিজাতীয় শত্রু আরবদেশের দ্বারদেশে উপনীত হইলে অধিপতিগণ সম্মিলিত হইয়া তাহার বিরুদ্ধে দণ্ডায়মান হইতেন। কিন্তু দেশমধ্যে এক দণ্ডের

হজরত মোহাম্মদ

জন্তুও আত্মকলহের বিরাম ছিল না। এক সম্প্রদায় অন্য সম্প্রদায়ের ধ্বংসের জন্তু সর্বদাই সচেষ্টি থাকিত। আরব দেশীয় লোকের বীরত্বের অভাব ছিল না। ব্যাত্তের বলের সঙ্গে তাহাদের বীরত্বের তুলনা করা যাইতে পারে। বিভিন্ন সম্প্রদায়ের মধ্যে কলহ বর্ধন, নররক্তে পৃথিবীরঞ্জন এবং দুর্ব্বলের সর্ব্বশ্ব লুণ্ঠনই তাহাদের বীরত্বের সার্থকতা ছিল। এই সময় আরবদেশ অজ্ঞানতিমিরে আচ্ছন্ন ছিল। দাম্পত্য বন্ধন অত্যন্ত শিথিল এবং নৈতিকজীবন ঘোর দুর্দশাগ্রস্ত ছিল। নরনারী সুরাপানে উন্মত্ত হইয়া কাবা মন্দিরের * চতুর্দিকে উলঙ্গভাবে নৃত্য করিত। পুরুষ সমাজের পশুবৎ আচরণে নারীজাতির দুর্দশার সীমা ছিল না। বহুবিবাহ, দাসীসংসর্গ এবং যথেষ্টা স্ত্রী পরিত্যাগের কোন বাধাই ছিল না। কি পুরুষ, কি স্ত্রীলোক, সকলেই দাসদাসিগণের সঙ্গে নির্ভূরাচরণের একশেষ

* আরব দেশের সর্ব্বপ্রধান 'ভজনালায়'। একেশ্বরবাদের আদি প্রবর্তক ইব্রাহিম এই মন্দির স্থাপন করেন; এক এবং অধিতীর নিরাকার পরমেশ্বরের উপাসনার জন্তুই এই মন্দির নিৰ্ম্মিত হইয়াছিল। কিন্তু কালক্রমে আরববাসীরা পৌত্তলিক ধর্ম্মাবলম্বী হইয়া উঠে, এবং কাবা মন্দিরে বহু সংখ্যক দেব-দেবীর মূর্ত্তি প্রতিষ্ঠা করিয়া তাহাদের পূজা করিতে আরম্ভ করে

হজরত মোহাম্মদ

করিত। তৎকালের আরব সমাজের ধর্মজীবন নৈতিক-
জীবন অপেক্ষাও অধিক শোচনীয় ছিল। কাষ্ঠ এবং
লোষ্ট্রও দেবতা বলিয়া পূজিত হইত। এক কোরেশ
সম্প্রদায়েরই দেবতার সংখ্যা পনের শতের ন্যূন ছিল না।
এ ধর্ম কুসংস্কারবিদ্ধ ও আত্মার অবনতিকর হইলেও
আরবগণের ধর্মবিশ্বাস সুগভীর ছিল। তাহাদের প্রকৃতি
সাতিশয় তেজস্বিনী ছিল। তেজস্বিনী প্রকৃতির সঙ্গে
সুগভীর ধর্মবিশ্বাস সম্মিলিত ছিল বলিয়া আরবগণ ধর্মের
নামে অনেক সময় উন্মত্ত হইয়া উঠিত।

পূর্বপুরুষ

আরবদেশের ঈদূশ দুর্বাস্থার সময় ৫৭০ খৃষ্টাব্দে
মহাপুরুষ মোহাম্মদ জন্মগ্রহণ করেন। মোহাম্মদের
জন্মপরিগ্রহের পূর্বেই তদীয় পিতার দেহান্তর হইয়াছিল।
মোহাম্মদ কোরেশ সম্প্রদায়ের হাশিমবংশ সম্বৃত ছিলেন।
তাহার মাতার নাম আমিনা। আমিনা রূপবতী, গুণ-
বতী ও বুদ্ধিমতী রমণী ছিলেন। তিনিও মোহাম্মদের
অতি শৈশবকালেই পরলোক গমন করেন। পিতৃমাতৃ-
হীন মোহাম্মদের লালনপালনের ভার তদীয় বৃদ্ধ পিতামহ
আবদুল মুতালিবের উপর পতিত হয়। বৃদ্ধ আবদুল

মুতালিবের হৃদয় বড় স্নেহপ্রবণ ছিল। মোহাম্মদের পিতার নাম আবদুল্লা; আবদুল্লা অতি সজ্জন ছিলেন। তিনি পিতার কনিষ্ঠ পুত্র এবং তাঁহার শেষ বয়সের স্নেহ-পুত্রলি ছিলেন। তাঁহার অকালমৃত্যুতে রুদ্ধ পিতার হৃদয় শোকে ভাঙ্গিয়া পড়ে। তাঁহার তাদৃশ মর্মান্বিত শোকের সময় মোহাম্মদের সুন্দর সহস্রমুখ শান্তি আনয়ন করিয়াছিল। শিশুর ভাবভঙ্গী, আকার-প্রকার রুদ্ধের স্মৃতিতে বালক আবদুল্লাকে জাগাইয়া দিত। তিনি শিশুর মুখে চোখে আবদুল্লার প্রতিচ্ছায়া দেখিয়া নয়নের বারি নয়নেই নিবারণ করিতেন। তিনি পরিজনদিগকে উদ্দেশ্য করিয়া বলিতেন, তোমরা মোহাম্মদকে সযত্নে প্রতিপালন করিও। এই সুন্দর শিশুই আমার বংশের সর্বশ্রেষ্ঠ সম্পদ। দুর্ভাগ্যক্রমে মোহাম্মদ বাল্যকালেই স্নেহশীল প্রতিপালক পিতামহকেও হারাইয়াছিলেন। মৃত্যুকালে পৌত্রকে স্বীয় জ্যেষ্ঠ পুত্র আবুতালেবের হস্তে সমর্পণ করিয়া যান। আবুতালেব ন্যায়বাদী এবং ধীমান ছিলেন। তিনি পিতৃমাতৃহীন ভ্রাতৃপুত্রের প্রতিপালন জন্য আরবদেশের তৎকালোচিত কোন বন্দোবস্তেরই ক্রটি করেন নাই। তিনি তাঁহাকে অপত্য-নির্বি-শেষে পালন করিয়াছিলেন।

প্রথম জীবন

আবুতালেবের আশ্রয়ে মোহাম্মদের বাল্যকাল অতি-বাহিত হয় ; তিনি কৈশোরে পদার্পণ করিয়াই বাগিজ্যো-পলক্ষে সিরিয়া রাজ্যে গমন করেন । সিরিয়া গমনকালে তাঁহার বয়ঃক্রম চতুর্দশ বৎসরের অধিক ছিল না ; বিজাতীয় ভাষার বিন্দু-বিসর্গও তাঁহার বোধগম্য ছিল না । এ কারণ সিরিয়ার সমস্তই তাঁহার নিকট দুর্কোধ্য বলিয়া প্রতীয়মান হইত । তথাপি এখানেই খৃষ্টবিশ্বাসীদের সংসর্গে তাঁহার জ্ঞানচক্ষু উন্মীলিত হইয়াছিল । এখানে তাঁহার তরল হৃদয়ে যে ভাববীজ উগ্ধ হইল, তাহাই কাল-ক্রমে ক্রমবিকাশের নিয়মে পরিবর্তিত হইয়া সংসার-তাপ-ক্লিষ্ট অসংখ্য নরনারীর আশ্রয়স্থল ছায়া-শীতল মহামহী-রূপে পরিণত হয় ।

কোন বিদ্যালয়ে মোহাম্মদের শিক্ষা লাভ হয় নাই । তাঁহার আবির্ভাবকালে আরবদেশে লিখন-প্রণালী প্রবর্তিত ছিল । কিন্তু উহার শৈশবাবস্থা তখনও অতিক্রান্ত হয় নাই । মোহাম্মদ লিখিতে পারিতেন না । প্রকৃতির

গ্রন্থপাঠেই তাঁহার শিক্ষালাভ হইয়াছিল। কিন্তু এই অনন্ত বিশ্বের যে কণামাত্র প্রত্যক্ষভাবে তদীয় দৃষ্টির গোচরীভূত হইত, প্রকৃতির রহস্য নির্ণয় জন্ত তাহাই তাঁহার আয়ত্ত ছিল, তদতিরিক্ত ক্ষেত্রে তাঁহার প্রবেশপথ রুদ্ধ ছিল। মানব-মস্তিষ্ক-উদ্ভাবিত গ্রন্থরাজি তাঁহার জ্ঞান-সম্পদ পরিবর্দ্ধিত করিতে পারে নাই। পূর্বগামী আদর্শগণের সঞ্চিত জ্ঞানভাণ্ডার তাঁহার নিকট অর্গলবদ্ধ ছিল; নিঃসঙ্গ মোহাম্মদ মরুস্থলীপূর্ণ আরবদেশের কোড়ে নিজের চিন্তা ও চতুর্দিকস্থ প্রাকৃতিক দৃশ্য লইয়াই আবিষ্ট থাকিতেন, এবং এই তন্ময়তাই তাঁহার চিত্তবিকাশের স্বেচ্ছরূপ হইয়াছিল।

মোহাম্মদ বাল্যকাল হইতে চিন্তাশীল, সত্যনিষ্ঠ ও কর্তব্যপরায়ণ বলিয়া পরিচিত ছিলেন। তাঁহার কাব্য, বক্য ও চিন্তা সকলই সত্যানুপ্রাণিত ছিল। তিনি কখনও নিরর্থক বাক্যব্যয় করিতেন না। তিনি বাহ্য কিছু বলিতেন, তাহাই কার্যোপযুক্ত, জ্ঞানগর্ভ এবং সারল্যপূর্ণ বলিয়া প্রতীয়মান হইত। অকাপট্য, গাম্ভীর্য ও আন্তরিকতা তাঁহার চরিত্রের বিশেষত্ব ছিল, কিন্তু তাঁহার প্রকৃতিতে অমায়িকতা, বন্ধুবাৎসল্য এবং রক্তরসেরও অভাব ছিল না। আত্মকালের মোহাম্মদকে স্মরণ করিলে

হজরত মোহাম্মদ

আমাদের মানসপটে একটি সুন্দর নবীন যুবকের চিত্র অঙ্কিত হইয়া থাকে। এ যুবকের সর্বাঙ্গ জীবিকা অর্জনের পরিশ্রমে স্বেদসিক্ত, চিত্ত নবাগত ভাবের আবেশে অশান্ত, হৃদয় পূর্ণাঙ্গ শিক্ষার অভাবে অমার্জিত ; কিন্তু তাঁহার বদনমণ্ডল জ্যোতির্ময় এবং তেজোদীপ্ত।

প্রথম পরিণয়

মোহাম্মদ যৌবনে পদার্পণ করিয়া খাদিজা নাম্নী নবতী বিধবা রমণীর কার্য্যাধক্ষ্যের পদে নিয়োজিত হন। তিনি তাঁহার কার্য্যে পুনর্বার সিরিয়া রাজ্যে গমন করেন। সেখানে তিনি আপন কর্তব্য কৰ্ম্ম বিশ্বস্তভাবে যোগ্যতা-সহকারে সম্পাদন করিয়াছিলেন। তাঁহার নিম্মল চরিত্র ও কর্তব্যনিষ্ঠা খাদিজার হৃদয়ে শ্রদ্ধার সঞ্চার করিয়াছিল। এই শ্রদ্ধা ক্রমে অনুরাগে পরিণত হয়। খাদিজা অগণবতী রমণী ছিলেন। তাঁহার অঙ্গুলিম্পর্শে মোহাম্মদে হৃদয়-তন্ত্রীতে অপূৰ্ব রাগিনী বাজিয়া উঠে। তৎকালে তিনি পঞ্চবিংশতি বর্ষের যুবক ; খাদিজার বয়স চত্বারিংশৎ বর্ষ অতিক্রম করিয়াছিল। কিন্তু গুণমুগ্ধ মোহাম্মদ বয়সের ব্যবধান বিস্মৃত হইয়া তাঁহাকে পরিণয় সূত্রে আবদ্ধ করেন। এই যে প্রেমের অভিসিঞ্চে

হজরত মোহাম্মদ

মোহাম্মদের হৃদয় ফুলের মত প্রস্ফুটিত হইয়া উঠে, তাহা বতদিন খাদিজা জীবিতা ছিলেন, ততদিন একদিনের জন্মও মলিন হয় নাই। তাঁহাদের প্রেমসিক্ত হৃদয় সর্বক্ষণ সদ্যোবিকশিত পুষ্পমঞ্জরীর স্থায় সৌরভপূর্ণ থাকিত। সেই শিথিলবন্ধন দাম্পত্য-প্রেমের যুগে মোহাম্মদের এক-নিষ্ঠ প্রেম বিস্ময়ের বিষয় ছিল। *

* খাদিজা মোহাম্মদের সহিত পরিণীতা হইবার পর ২৫ বৎসর জীবিতা ছিলেন। তাঁহাদের দাম্পত্য-জীবন বড় মধুর ছিল। সেই বহুবিবাহের যুগে মোহাম্মদ তাঁহার জীবদ্দশায় দ্বিতীয় দার পরিগ্রহ করেন নাই। খাদিজা বহুগুণালঙ্কতা সাধ্বী রমণী ছিলেন। তাঁহার পরলোক গমনের পর মোহাম্মদ আয়েসাকে বিবাহ করেন। আয়েসাও পতিপরায়ণা গুণবতী পত্নী ছিলেন। তিনি একদিন কথাপ্রসঙ্গে মোহাম্মদকে বলেন, “আমি কি খাদিজা অপেক্ষা শ্রেষ্ঠ নহি? তিনি বৃদ্ধা ও বিধবা ছিলেন। আমি কি খাদিজা অপেক্ষা আপনার অধিক প্রিয় নহি?” মোহাম্মদ প্রত্যুত্তরে বলেন, “ঈশ্বর সাক্ষী, ইহা তোমার ভুল, যখন কেহ আমার বাক্যে বিশ্বাস করে নাই তখন খাদিজা আমার অহুগামিনী ছিলেন; সেই দুঃসময়ে সমগ্র পৃথিবীতে খাদিজা আমার একমাত্র সঙ্গিনী ও হিতাকাঙ্ক্ষিনী ছিলেন।” ফলতঃ খাদিজা তাঁহার জীবনের আশা ও সাধনার স্বরূপ ছিলেন। মোহাম্মদ খাদিজার মৃত্যুর পর বহুবিবাহ করিয়াছিলেন। খৃষ্টান

ইসলাম

ধনবতী খাদিজার সঙ্গে পরিণয় সূত্রে আবদ্ধ হওয়ায় মোহাম্মদের অর্থের অভাব বিদূরিত হইয়াছিল ; তিনি বিষয়-কর্ম ত্যাগ করিয়া আধ্যাত্মিক উন্নতিসাধন জন্ত কায়মনোবাক্যে প্ররত্ত হন। সৃষ্টিরহস্তের অন্তস্তনে কোন্ মহাশক্তি বিরাজিত রহিয়াছে, তাহার স্বরূপ কি, মানবের সুখ দুঃখ, বিপদ সম্পদের আবর্তন কোন্

লেখকগণ তজ্জন্ত তাঁহার যথেষ্ট নিন্দা করিয়াছেন। আমীর আলী প্রভৃতি আধুনিক মোসলমান লেখকগণ নানা যুক্তি প্রদর্শন করিয়া তাঁহার কার্যের সমর্থন করিয়াছেন। যুবক মোহাম্মদ প্রোচা খাদিজাকে বিবাহ করেন। মুর সাহেব লিখিয়াছেন, মোহাম্মদ হুদীর্ণ পঞ্চবিংশতি বৎসর একমাত্র খাদিজার প্রেমে পরিতৃপ্ত ছিলেন। খাদিজা মোহাম্মদের জীবদ্দশায় পরলোক গমন করেন। তখন মোহাম্মদের বয়ঃক্রম পঞ্চাশ বৎসর অতিক্রম করিয়াছিল। খাদিজার মৃত্যুর পর মোহাম্মদ নোদা নামক এক জন প্রোচা বিধবাকে বিবাহ করেন। অতঃপর মোহাম্মদ বালিকা আয়েসাকে পত্নীরূপে গ্রহণ করেন। আয়েসা মোহাম্মদের সর্বপ্রথম প্রচার-বন্ধু আবু বকরের কন্যা। তাঁহার সঙ্গে ঘনিষ্ঠ সম্পর্ক স্থাপন করিবার কল্পনাতেই মোহাম্মদ আয়েসার পাণিপীড়ন করেন। ইহার পর তিনি ওমরের বিধবা কন্যা হাফসাকে বিবাহ করেন।

কারণে হইয়া থাকে, বিপুল বিশ্বের নানা বৈপরীত্য ও বৈচিত্র্যের মধ্যে ঐক্যসূত্র কোথায় নিহিত আছে, এই সব তত্ত্বানুসন্ধানেই তিনি ধ্যানরত তাপসের স্থায় সমাহিত হইতে আরম্ভ করেন। তিনি এরূপ এক সৌন্দর্য-

ওমর প্রথমে আবুবকর এবং তারপর ওসমানের সঙ্গে আপনার কন্যার বিবাহের প্রস্তাব করেন। কিন্তু তাঁহারা উভয়েই সে প্রস্তাব প্রত্যাখ্যান করেন। ইহাতে তাঁহাদের মধ্যে প্রবল বিবাদের সূচনা হয়। এই বিবাদ অকস্মেৎ বিনষ্ট করিবার উদ্দেশ্যে মোহাম্মদ নিজের হাকসার সঙ্গে পরিণয়সূত্রে আবদ্ধ হন। হাকসার সঙ্গে বিবাহের পরবৎসর মোহাম্মদ হিন্দ-উস-সালমা ও জয়নব উম-উল-মসাকিম (ইনি অতিশয় দয়াবতী ছিলেন বলিয়া লোকে ইহাকে পরিবের মা বলিত) নামী দুই জন অনাথা মোসলমান রমণীকে বিবাহ করিয়া আশ্রয় প্রদান করেন। অতঃপর জৈয়েদ নামক এক জন মোসলমানের পরিত্যক্তা পত্নীর সঙ্গে মোহাম্মদের পরিণয় ক্রিয়া সম্পাদিত হয়। জৈয়েদ মোহাম্মদের পোষ্যপুত্র ছিলেন। একান্ত মোহাম্মদ তাঁহার পরিত্যক্তা পত্নীকে বিবাহ করিয়া তৎকালের আরবসমাজে অপবাদগ্রস্ত হন। এই বিবাহ সম্বন্ধে আমীর আলী লিখিয়াছেন, পৌত্তলিকেরা বিমাতা এবং স্বাভূতির সঙ্গে বিবাহ অস্বাভাবিক করিত ; কিন্তু পোষ্যপুত্রের স্ত্রীকে বিবাহ করা তাহাদের সমাজে অতিশয় নিন্দনীয় ছিল। তাহাদের বিশ্বাস ছিল যে পোষ্যপুত্র গ্রহণে একজাতীয় ঘটে। আরবগণের তাদৃশ ভ্রান্ত বিশ্বাস দূর করিবার

হজরত মোহাম্মদ

লোকের আভাস পাইয়াছিলেন, যেখানে সমস্ত বিশ্বের অসংখ্য ধনাত্মক সঙ্গীত। এক মহাশক্তির পদতলে লয় প্রাপ্ত হইয়া শ্রোতামাত্রেরই হৃদয় পুলকবিষ্ট করিতেছে। এই অপরূপ সৌন্দর্যালোকে উত্তীর্ণ হইবার জন্য তিনি অহোরাত্র ধ্যানমগ্ন থাকিতেন। এই ভাবে পঞ্চদশ বর্ষ অতিবাহিত হয়। মোহাম্মদ ৬০৯ খৃষ্টাব্দের রমজান মাসে নির্জন গিরিকন্দরে আত্মচিন্তা করিতে মক্কার নিকটবর্তী হরপর্কতে গমন করেন। খাদিজা তাঁহার সঙ্গিনী ছিলেন।

জন্ম কোরাণের ত্রয়ত্রিংশ অধ্যায়ের কতিপয় বচন প্রচারিত হইয়াছিল। * * * এই বিবাহ সম্বন্ধে মোহাম্মদের পবিত্রতার একটি সর্বোৎকৃষ্ট প্রমাণ এই যে, ঐ বিবাহ অন্তঃকর্ত্তেও জৈয়েদ মোহাম্মদের পূর্ববৎ অল্পবয়সী ছিলেন। মোহাম্মদের আর একজন পত্নীর নাম জোয়াইবিয়া। ইনি একটি যুদ্ধ উপলক্ষে মোহাম্মদের হস্তে বন্দী হন। বন্দী রমণী মোহাম্মদের সদ্যবহারে মুক্ত হইয়া তাঁহাকে পতিত্বে বরণ করেন। মোহাম্মদ একজন ইহুদি রমণীকে বিবাহ করেন। এ রমণীও যুদ্ধ উপলক্ষে মোহাম্মদের হস্তে বন্দী হন। মোহাম্মদের এই পত্নীর নাম ছিল সফিয়া। মোহাম্মদ সর্বশেষে মহাবীর খালেদের জনৈক আত্মীয়কে (মৈমুনাকে) বিবাহ করেন। খালেদের সহিত প্রীতিমুখে আবদুল হাইবার উদ্দেশ্যেই মোহাম্মদ এই বৃদ্ধা রমণীর (বিবাহ কালে ইহার বয়স পঞ্চাশ বৎসর অতিক্রম করিয়াছিল) পাণিগ্রহণ

হজরত মোহাম্মদ

তাঁহারা হরপর্কতে একমাস অবস্থান করেন। এই সময় মোহাম্মদ একদা খাদিজাকে আনন্দবিহ্বল হইয়া বলেন, “আমি পরমেশ্বরের অনির্কচনীয় রূপা লাভ করিয়াছি, আমার সমস্ত সংশয়-অন্ধকার বিদূরিত হইয়াছে, আমার মানসনয়নে এক অপরূপ আলোক উদ্ভাসিত হইয়াছে। কাবা মন্দিরের দেবমূর্তি সকল নিষ্কীব পদার্থ মাত্র। পরমেশ্বরই মনুষ্যের একমাত্র উপাস্ত। তিনি মহান, জীবন্ত ও সত্যস্বরূপ। পরমেশ্বরই সমস্ত বিশ্বের একমাত্র নিয়ন্তা।” মোহাম্মদের ধ্যাননিরত অনন্তসাধারণ হৃদয়ে এই মহাসত্য প্রকটিত হইয়া তাঁহাকে বিমল আনন্দরসে পরিপ্লুত করিল; তিনি মনুষ্যমাত্রকেই এই আনন্দের অংশী করিতে ব্যাকুল হইয়া পড়িলেন। তিনি একেশ্বর-করেন। কোন কোন ঐতিহাসিক মোহাম্মদের একজন গ্রীক জাতীয়া উপপত্নী ছিল বলিয়া অপবাদ দিয়াছেন। কিন্তু এ অপবাদ অমূলক বলিয়া আমীর আলী সাহেব প্রদর্শন করিয়াছেন। আমরা সুপ্রসিদ্ধ হালামের বাক্যের মৰ্ম্মাচ্ছবাদ প্রদান করিয়া এই প্রসঙ্গের উপসংহার করিতেছি। কোরাণ পাঠ করিলে প্রত্যেক ব্যক্তির মনে এরূপ ধারণা জন্মে যে, এই গ্রন্থ আদ্যন্ত আশ্বনিগ্রহ এবং নিষ্ঠার ভাব দ্বারা অল্পপ্রাণিত। বস্তুতঃ কোন নবধর্ম প্রবর্তক বিলাসব্যাসনে মত্ত হইয়া স্বামী ফল লাভ করিতে অসমর্থ।

হজরত মোহাম্মদ

বাদ ও বিশুদ্ধ নীতি প্রচার করিতে উখিত হইলেন। এই নব ধর্মের নাম ইসলাম। * প্রথমে ইসলাম অতি মন্দ

* ইসলাম শব্দের অর্থ ঈশ্বর নির্ভর। কাহারও কাহারও মতে ইসলাম শব্দের অর্থ পরিভ্রাণ। “পরমেশ্বর ব্যতীত কোন উপাস্ত নাই এবং মোহাম্মদ তাঁহার প্রেরিত ও ভূতা,” ইহাই ইসলামধর্মের মূল সূত্র। সাধু ভজনা, মূর্তি নির্মাণ, ইসলামধর্ম-বিরুদ্ধ। “পরমেশ্বর এক এবং অদ্বিতীয়, তিনি শক্তিমান, দয়ালু ও পরম প্রেমিক, মনুষ্য মাঝেই সমান এবং দয়ার পাত্র, প্রবৃত্তি সংযম করা আবশ্যক, ঈশ্বরকে কৃতজ্ঞ অন্তরে স্মরণ করা কর্তব্য, মনুষ্য মাঝেই স্বীয় দুর্দশের জন্য পরলোকে দায়ী” ইত্যাদি বিশ্বাসই ইসলামধর্মের ভিত্তিভূমি। উপাসনা, উপবাস, দান ও তীর্থপর্যটন ইসলামধর্মচর্চার উপায় বলিয়া নির্দিষ্ট হইয়াছে। এতন্মধ্যে উপাসনাই ইসলামধর্মাবলম্বীর সর্ব প্রধান কর্তব্য কর্ম। মোসলমান সমাজে দৈনিক পাঁচ বার ঈশ্বরোপাসনার নিয়ম প্রতিষ্ঠিত করিবার জন্য মোহাম্মদ ঈশ্বরের আদেশ-বাণী লাভ করিয়াছিলেন। তিনি উপাসনার উপকারিতা সম্বন্ধে পুনঃ পুনঃ উপদেশ প্রদান করিয়াছেন। তিনি এক স্থানে বলিয়াছেন, “দেবদূতগণ দিবারাত্রি তোমাদের নিকট আবির্ভূত হইয়া থাকেন। দিবাচর দেবদূতগণ রাত্রিকালে স্বর্গে প্রত্যাবৃত্ত হইলে পরমেশ্বর জিজ্ঞাসা করেন, জীবসকলকে কি অবস্থায় দেখিয়া আসিয়াছ? তাঁহারা উত্তর করেন, আমরা মর্ন্ত্যে গমন করিয়া জীবসকলকে উপাসনারত দেখিয়াছিলাম, ফিরিয়া আসিবার সময়ও

হজরত মোহাম্মদ

গতিতে আরবসমাজে প্রবিষ্ট হইয়াছিল, মোহাম্মদ লোকলোচনের অন্তরালে নিহনে কতিপয় অন্তরঙ্গ নবীন যুবককে ধর্মোপদেশ দিতেন। একাদিক্রমে তিন বৎসর-কাল ধর্মপ্রচারের পরও তাঁহার শিষ্যসংখ্যা চল্লিশের অধিক হয় নাই।

তাহাদিগকে উপাসনারত দেখিয়া আসিয়াছি।” তিনি আর এক-স্থানে বলিয়াছেন, “সর্বদা উপাসনা করিও, উপাসনা আমাদিগকে পাপ ও দুষ্কার্য হইতে রক্ষা করে। ঈশ্বরের নাম উচ্চারণ পরম পবিত্র কর্ম।” একজন পাশ্চাত্য লেখক বলিয়াছেন, “মোসল-মানের প্রার্থনা-মন্দির মানবহস্তে নিৰ্ম্মিত নহে। ঈশ্বরস্বষ্ট পৃথিবীর সর্বস্থানে অথবা তাঁহার আকাশতলে মোসলমানের উপাসনা মন্দির। ইহা ইসলামধর্মের গৌরবের বিষয় সন্দেহ নাই। বস্তুতঃ মোসল-মানের নিকট স্থানাস্থানভেদ নাই; উপাসনার সময় সমাগত হইলে সর্বত্র ব্যাকুল হৃদয়ে ঈশ্বরের গুণানুবাদ করা যাইতে পারে। ইহা ইসলামধর্মের একটি বিশেষত্ব।” ইসলামধর্মামুখোদিত ঈশ্বর স্তুতি অতিশয় মনোহর, আমরা উহার শেষাংশ হইতে কিঞ্চিৎ উদ্ধৃত করিতেছি। “পরমেশ্বর ব্যতীত আর কোন উপাস্ত নাই। তিনি জীবন্ত,—চিরকাল জীবন্ত। তাঁহার নিদ্রা নাই, তন্দ্রাও নাই। স্বর্ণ মর্ত্য এবং স্বর্ণ মর্ত্যের বাবতীয় পদার্থ তাঁহার। তাঁহার অহুমতি ব্যতীত কে তাঁহার মহিমা ঘোষণা করিতে পারে? ভূত ভবিষ্যৎ সমস্তই তাঁহার নখদর্পণে, কিন্তু তিনি আত্মস্বরূপ সম্বন্ধে বাহ্য প্রকাশ-

প্রথম প্রচার

মোহাম্মদের অন্ততম শিষ্যের নাম আবুবকর ছিল। আবুবকরের ধর্মোৎসাহ সাতিশয় প্রবল ছিল। তিন বৎসর পরে ইসলামধর্মবিশ্বাসীর সংখ্যা চল্লিশ পূর্ণ হইলে তিনি প্রকাশ্য ভাবে ধর্মপ্রচার করিবার জন্য মোহাম্মদকে অনুরোধ করিলেন। প্রিয়তম শিষ্যের ঐকান্তিক অনুরোধ উপেক্ষা করিতে না পারিয়া মোহা-

করিয়াছেন, তাহা ব্যতীত তাঁহার অণু কোন তত্ত্বই মানবের জ্ঞানায়ত্ত নহে। স্বর্গে মর্ত্যে তাঁহার প্রভুত্ব, এ প্রভুত্ব রক্ষার জন্ত তাঁহাকে কষ্ট স্বীকার করিতে হয় না। তিনি মহান্ ও শক্তিমান্।” আমরা আর একস্থান হইতে উদ্ধৃত করিতেছি। “হে পরমেশ্বর, আমাকে তোমার প্রেম বিতরণ কর, যেন আমি তোমাকে ভক্তি করিতে পারি, যেন তোমার প্রিয় কার্য সাধন করিতে পারি। আমার নিকট তোমার প্রেমকে আত্মপ্রেম অপেক্ষা গরীবান কর।” দেবদূতগণ মানবের নিকট দৈবের বার্তা বহন করিয়া আনেন, ধর্মপ্রচার জন্ত সময় সময় “প্রফেটগণ” (Prophets) জন্মগ্রহণ করেন, পরলোকে পাপ-পুণ্যের তিরস্কার ও পুরস্কার হইয়া থাকে, মোহাম্মদ এ সকল মতও প্রচার করিয়াছেন। অদৃষ্টবাদ, পুনরুত্থান (Resurrection of the body) এবং শেষ বিচার দিন ইত্যাদি তত্ত্বও ইসলামধর্মের অঙ্গীভূত। মোহাম্মদের প্রচারিত একেশ্বরবাদ তাঁহার নিজের উদ্ঘাটিত

মুহাম্মদ সর্বজন সমক্ষে স্বীয় ধর্মমত ঘোষণা করিবার জন্য আরবদেশের সর্বশ্রেষ্ঠ ভজনালয় কাবা মন্দিরে গমন করিলেন। আবুবকর প্রথমতঃ একেশ্বরবাদের মহিমা বর্ণনা

করিতেন। এ সময়ে আমরা কোরাণের উক্তি উদ্ধৃত করিতেছি। “ইব্রাহিমের ধর্ম সত্য, ইব্রাহিম অনেকেশ্বরবাদী ছিলেন না। ১৩২। বল, আমরা ঈশ্বরে বিশ্বাস স্থাপন করিলাম এবং যাহা ইব্রাহিমের প্রতি ও যাহা এসমাইল, ইসহাক, ইয়াকুব এবং তাঁহাদের সন্তানগণের প্রতি অবতীর্ণ হইয়াছে এবং যাহা অপর তত্ত্ববাহকগণের প্রতি তাঁহাদের ঈশ্বর কর্তৃক প্রদত্ত হইয়াছে তৎসমুদয়ের প্রতি বিশ্বাস স্থাপন করিলাম। তাঁহাদের কাহাকেও প্রভেদ করিতেছি না এবং সেট ঈশ্বরের অমুগত। ১৩৩। মুসায়ী ও ঈশায়া লোকেরা বিশ্বাস করিলে আলোক পাইতে পারে। * * ১৩৪।” (গিরিশবাবুর কোরাণের বঙ্গানুবাদ, ২য় অধ্যায়।) ইসলামধর্মের নীতিও অতি বিশুদ্ধ। “অন্তের নিকট তুমি যেরূপ ব্যবহার পাইতে ইচ্ছা কর, তুমিও অন্তের প্রতি সেইরূপ ব্যবহার করিও।” ইসলামধর্মাবলম্বীকে এই মহৎ বাক্যই সংসার সমুদ্রে দিগ্‌নির্ঘ্ন-যন্ত্ররূপে ব্যবহার করিতে মোহাম্মদ উপদেশ প্রদান করিয়াছেন। “কাহারও সঙ্গে ব্যবহারকালে ত্রায়পথভ্রষ্ট হইও না।” এই মহৎবাক্যও মোহাম্মদের উপদেশ। দানধর্ম আচরণ জন্ত মোহাম্মদ মোসলমানদিগকে পুনঃ পুনঃ উত্তেজিত করিয়াছেন, এবং সহস্রব্যমাত্রকেই তাহার আয়ের এক নির্দিষ্ট অংশ পরোপকারার্থে

করিয়া। তারপর পৌত্তলিকধর্মের দোষপ্রদর্শন করিলেন।
উগ্রস্বভাব আরবগণ স্বধর্মের নিন্দা শ্রবণে ক্রোধাক্ত
হইয়া বিধর্মীদিগকে ধরাপৃষ্ঠ হইতে অপসৃত করিবার

প্রদান করিতে অনুশাসন করিয়াছেন। ঈশ্বরসৃষ্ট জীবের প্রতি
দয়া প্রদর্শন না করিলে, কেহ তাঁহার প্রেমলাভ করিতে পারে না,
ইহাই মোহাম্মদ-কথিত দান-মাহাত্ম্য। মোহাম্মদ একদিন উপদেশ
দান কালে বলিয়াছিলেন, “সৃষ্টিকালে পৃথিবী কল্পিত হইতেছিল।
একারণ ঈশ্বর পৃথিবীর উপর পর্বতের গুরুভার স্থাপন করিয়া
উহাকে স্তূড় করিয়াছিলেন। পর্বত অপেক্ষা লৌহ অধিক শক্তি-
শালী, কারণ, লৌহের আঘাতে পর্বত ভগ্ন হইয়া পড়ে। লৌহ
অপেক্ষা অগ্নি অধিক শক্তিশালী, কারণ, অগ্নি লৌহকে দ্রব করে।
অগ্নি অপেক্ষা জল অধিক শক্তিশালী, কারণ, জল অগ্নিকে নির্বাপিত
করে। বায়ু জল অপেক্ষা অধিক শক্তিশালী, কারণ, বায়ু জলকে
সঞ্চালিত করে। কিন্তু যদি কোন সজ্জন দক্ষিণ হস্তে দান করিয়া
বাম হস্তকে তাহা জানিতে না দেন, তবে তিনিই সর্বশ্রেষ্ঠ, কারণ,
তাঁহার নিকট সকলেই পরাজিত হয়।” ইসলামধর্মের উপদেশ
সর্বব্যাপী। প্রতিবেশীর সঙ্গে কিরূপ ব্যবহার করা আবশ্যক কোরাণে
তৎসম্বন্ধেও উপদেশ লিপিবদ্ধ রহিয়াছে। আমরা কিয়দংশ উদ্ধৃত
করিতেছি। “বিশ্বাসিগণ, তোমরা আপনগৃহ ব্যতীত (অন্য) গৃহ,
যে পর্যন্ত তাহার স্বামীর অনুমতি প্রার্থনা ও সালাম না কর, প্রবেশ
করিও না। ২৭।” (গিরিশবাবুর কোরাণের বঙ্গানুবাদ, ১১৭)

হজরত মোহাম্মদ

উদ্দেশ্যে তাঁহাদিগকে নিষ্ঠুরভাবে প্রহার করিতে আরম্ভ করিল। কাবা মন্দিরে কোলাহল উখিত হইল। দয়ার্দ্ৰচিত্ত

অধ্যায়।) মোহাম্মদের আবির্ভাব কালে আরব রমণীর অবস্থা অতি শোচনীয় ছিল। আরবসমাজ ব্যভিচার, দাসী-সংসর্গ, সাময়িক বিবাহ ও বহুবিবাহ দোষে কলঙ্কিত ছিল। পিতা-মাতা আবশ্যক মত কন্যাসন্তানকে গৃহপালিত পশুবৎ বিক্রয় করিতে কুণ্ঠিত হইত না, আরব রমণী পিতা বা স্বামীর সম্পত্তি স্বরূপ ছিল। তাহারা স্বামীর মৃত্যুর পর অগ্রাণু তত্ত্ব সম্পত্তির গ্রাস উত্তরাধিকারীর হস্তগত হইত। এজন্য সংপুত্রের সঙ্গে বিমাতার বিবাহের গ্রাস বীভৎস প্রথা আরবসমাজে দেখা যাইত। আরব পিতামাতা অনেক সময় কন্যাসন্তানকে মৃত্তিকাগর্ভে প্রোথিত করিয়া বধ করিত। আরব-সমাজের নারীজাতির কোন অধিকারই ছিল না। ফলতঃ তাঁহাদের দুর্দশার সীমা ছিল না। মোহাম্মদ নারীজাতির উন্নতি বিধানকল্পে বহু ব্যবস্থা করিয়াছিলেন। মোহাম্মদের সমস্ত ব্যবস্থার মূলে নারী-জাতির প্রতি সম্মানের ভাব অন্তর্নিহিত রহিয়াছে। ব্যভিচার নিবারণ কল্পে অবরোধপ্রথা প্রবর্তিত করা হইয়াছিল। মোহাম্মদ দাসী-সংসর্গ নিষেধ করিয়াছিলেন। “বিশ্বাসী শুদ্ধাচারিণী রমণীকে ও তোমাদের পূর্ববর্তী গ্রন্থাধিকারীদিগের শুদ্ধাচারিণী কন্যাকে বিবাহ করিবার জন্য তোমাদিগকে অহুমতি দেওয়া হইতেছে। তোমরা গুপ্ত-প্রণয়-লোলুপ ব্যভিচারী না হইয়া এবং উপপত্নী গ্রহণ না করিয়া শুদ্ধাচারে কালযাপন পূর্বক তাহাদিগকে তাহাদের যৌতুক দান করিলেই এক্ষণ

তমিম পরিবারের লোকেরা দৌড়াইয়া আসিয়া তাঁহা-
দিগকে শত্রুর কবল লইতে রক্ষা করিল। তাহাদের তাদৃশ

করিতে পার। ৭।” (কোরাণ, ৫ম অধ্যায়)। দাসী-সংসর্গ
নিষিদ্ধ হইয়াছিল। এই নিষেধবিধি কার্য্যকরী করিবার জন্য
দাসী-বিবাহ অবৈধ বলিয়া ঘোষণা করা হইয়াছিল। (কোরাণ,
৪র্থ অধ্যায়, ২৫শ আয়েত)। মোহাম্মদ সাময়িক বিবাহের
প্রথা তুলিয়া দিয়াছিলেন। পুরুষের বিবাহের সংখ্যা সীমাবদ্ধ
করা হইয়াছিল। “তোমাদের যেকোন অভিক্রটি তদনুসারে হুই,
তিন ও চারি নারীর পাণিগ্রহণ করিতে পার, পরন্তু যদি আশঙ্কা
কর জায় ব্যবহার করিতে পারিবে না, তবে এক নারীকে বিবাহ
করিবে। অথবা তোমাদের দক্ষিণ হস্ত যাহার উপর অধিকার
লাভ করিয়াছে, তাহাকে (পত্নী স্থলে) গ্রহণ করিবে। ইহা অগ্র্য
না করার নিকটবর্তী। ৪।” (গিরিশবাবুর কোরাণের বঙ্গানুবাদ,
৪র্থ অধ্যায়)। নারীজাতির প্রতি অসদাচরণ নিবারণ জন্য
মোহাম্মদ উপদেশ প্রদান করিয়া গিয়াছেন। “বৈধরূপে তাহাদের
সঙ্গ করিবে, পরন্তু যদি তোমরা তাহাদিগকে অবজ্ঞা কর, তবে হয়ত
এমন এক বস্তুকে অবজ্ঞা করিলে যে, তাহাতে ঈশ্বর প্রচুর অকল্যাণ
করিয়া থাকেন।” (গিরিশবাবুর কোরাণের বঙ্গানুবাদ, ৪র্থ অধ্যায়,
২৪ আয়েত)। মোহাম্মদের ব্যবস্থায় সংপুলের সঙ্গে বিমাতার
বিবাহের প্রথা বিলুপ্ত হইয়াছিল। মোহাম্মদ নারীজাতিকে বিবিধ
অধিকারে স্বত্ববতী করিয়াছেন। “যাহা পিতামাতা ও স্বগণ

সাহায্য প্রাপ্ত না হইলে মোহাম্মদ ও তদীয় অনুচরবর্গের
প্রাণনাশ ঘটিত । *

পরিত্যাগ করে, তাহা হইতে পুরুষের অংশ এবং যাহা পিতা ও
স্বগণ পরিত্যাগ করে, তাহা অল্প বা অধিক হউক, তাহা হইতে
নারীর অংশ নির্দ্ধারিত ।” ৫—৭ । “বিশ্বাসিগণ, বলপূর্ব্বক স্ত্রীগণের
স্বত্ব গ্রহণ করা তোমাদের অবৈধ । স্পষ্ট হুজ্জিয়ায় তাহাদের যোগ
দেওয়া ব্যতীত তোমরা তাহাদিগকে যে কোন দ্রব্য দান করিয়াছ,
তাহা গ্রহণে নিষেধ করিও না ।” (গিরিশবাবুর কোরাণের বঙ্গাঙ্ক-
বাদ, ৪র্থ অধ্যায়) । এ সকল সুব্যবস্থা সত্ত্বেও মোসলমান সমাজে
নারীজাতির অবস্থা নানাকারণে সবিশেষ উন্নত হইতে পারে নাই ।
কিন্তু উন্নতি লাভ যে করিয়াছিল, তাহা অবশ্য স্বীকার্য্য ।

* এই ব্যাপারে আবুবকরই সর্ব্বাপেক্ষা অধিক প্রস্তুত হইয়া-
ছিলেন । তিনি ২৪ ঘণ্টা অজ্ঞানাবস্থায় ছিলেন । আবুবকর
মোহাম্মদের একান্ত অমুরক্ত ছিলেন । তিনি দিবারাত্রি সংজ্ঞাহীন
থাকিয়া যখন প্রথম চক্ষুরুন্মীলন করিলেন, তখনই মোহাম্মদ কেমন
আছেন, তাহা জানিতে উৎসুক হইলেন । একজন অমুর্তর তাঁহার
সংবাদ লইয়া আসিয়া বলিল, তিনি কুশলে আছেন । আবুবকর
এই সংবাদ শ্রবণ করিয়া বলিলেন, “আমি মোহাম্মদকে না দেখিয়া
অল্পজল কিছুই গ্রহণ করিব না ।” তিনি সমস্ত দিন অনাহারে
রহিলেন, তারপর রাত্রিকালে রাজপথ নির্জন হইলে মোহাম্মদের
বাস ভবনে গমনপূর্ব্বক তাঁহাকে দর্শন করিয়া উপবাস ভঙ্গ করিলেন ।

হজরত মোহাম্মদ

মোহাম্মদের প্রকাশ্যভাবে ধর্মপ্রচারের প্রথম উত্তম এইরূপ শোচনীয় হইয়াছিল। কিন্তু মোহাম্মদ ও তাঁহার শিষ্যবৃন্দ ভগ্নোৎসাহ হন নাই। এই ঘটনার পর কতিপয় দিবস অতিবাহিত হইলেই তাঁহারা পুনর্বার নবোৎসাহে ধর্মপ্রচার করিতে আরম্ভ করিলেন। একে একে শিষ্য সংখ্যাও বৃদ্ধি পাইতে লাগিল।

উংপীড়নের সূচনা

মোহাম্মদ কোরেশ সম্প্রদায়ভুক্ত ছিলেন। কোরেশগণ আরবদেশের সর্বশ্রেষ্ঠ ভজনালায় কাবা মন্দিরের পুরোহিত ছিল। সুতরাং অন্যান্য সম্প্রদায় ধর্ম বিষয়ে তাহাদের প্রভুত্বাধীন ছিল। একারণ মোহাম্মদের নবধর্মপ্রচারে কোরেশগণই সর্বাপেক্ষা অধিক ভীত হইল। মোহাম্মদ সফলকাম হইলে আপামর সাধারণ সর্বশ্রেণীর ধর্মবিশ্বাসের আমূল পরিবর্তন ঘটিবে এবং তাহাতে তাহাদের প্রভুত্ব ও প্রতিপত্তি সাংঘাতিকরূপে আঘাতপ্রাপ্ত হইবে, তাহারা ইহা দিব্যচক্ষে দেখিতে পাইয়া তাঁহার বিরুদ্ধে দণ্ডায়মান হইল। মোহাম্মদ সাম্যবাস্তা ঘোষণা করিয়াছিলেন। তিনি জলদগন্তীরস্বরে

প্রচার করিয়াছিলেন, জগদীশ্বরের দৃষ্টিতে মনুষ্যমাত্রেরই সমান। এ মতের প্রবর্তনে কোরেশগণের প্রভুত্ব ও প্রতিপত্তির বিলোপ অবশ্যসম্ভাবী বলিয়া তাহারা অকুরেই মোহাম্মদকে বিনষ্ট করিতে কৃতনস্কল্প হইল।

কোরেশগণ একযোগে মোহাম্মদ ও তদীয় শিষ্যসকলকে উৎপীড়ন করিবার জন্য নানা উপায় অবলম্বন করিতে প্রতিজ্ঞা করিল। প্রত্যেক গৃহস্থানামী আপন অধিকারে নবধর্মকে কঠাবরোধ করিয়া বিনাশ করিবার ভারগ্রহণ করিল। ইসলামধর্মবিশ্বাসিগণের অপমান ও লাঞ্ছনার সীমা রহিল না; তাহারা কারারুদ্ধ, অনাহারে ক্লিষ্ট এবং প্রহৃত হইতে লাগিল। রমধা পর্কত এবং বৎহা ইসলামধর্ম-বিশ্বাসীদের নির্যাতনের স্থান ছিল। কেহ পৌত্তলিকতায় আস্থাহীন বলিয়া প্রকাশ পাইলেই তাহাকে কোরেশগণ মরুভূমির উত্তপ্ত বালুকার উপর সূর্য্য-কিরণে দগ্ধ করিত। যখন ঈদূশ নিষ্ঠুর ব্যবহারে তাহাদের কণ্ঠ, তালু শুষ্ক হইয়া পড়িত এবং মৃত্যু আসন্ন হইত, তখন তাহাদিগকে হয় নবধর্ম পরিত্যাগ করিতে, না হয় মৃত্যুকে আলিঙ্গন করিতে বলা হইত। কেহ কেহ পরিভ্রাণ লাভ জন্য নবধর্ম পরিত্যাগ করিতে প্রতিশ্রুত হইয়া মুক্তিলাভের পরক্ষণেই পুনর্ব্বার মোহাম্মদের শরণাপন্ন

হইত ; অধিকাংশ ব্যক্তিই আপন ধর্ম্মমতে অটল থাকিত । *

এইরূপ কঠোর উৎপীড়নেও কোন ফলোদয় হইল না । ইসলামধর্ম্মবিশ্বাসিগণ কিঞ্চিৎমাত্রও বিচলিত বা ধর্ম্মপ্রচারে বিরত হইলেন না, দিন দিন তাঁহাদের দল বৃদ্ধি পাইতে লাগিল । কোরেশগণ পাশব বলে নবধর্ম্মবিশ্বাসী-দিগকে বিনষ্ট করিতে না পারিয়া প্রলোভনে মোহাম্মদকে বশীভূত করিতে সঙ্কল্প করিল ।

* বিলাল নামক এক কাক্রি ক্রীতদাস ইসলামধর্ম্ম গ্রহণ করিয়াছিল । তদীয় প্রভু ওমিয়া একারণ তাহাকে উৎপীড়নের একশেষ করিত । বিলালকে প্রত্যহ মধ্যাহ্নকালে বংহার উত্তপ্ত বালুকার উপর উর্দ্ধমুখে শয়ান করাইয়া তাহার বুকে গুরুভার প্রস্তর স্থাপন করা হইত । ওমিয়া কহিত বিলাল, হয় তুমি নবধর্ম্ম পরিত্যাগ কর, না হয় এইরূপ দুঃসহ যন্ত্রণা ভোগ করিয়া মৃত্যুমুখে পতিত হইতে প্রস্তুত হও । কিন্তু বিলাল কিছুতেই স্বমত পরিত্যাগ করিতে স্বীকৃত হইত না, এবং পিপাসায় মৃত্যু দশা উপস্থিত হইলে অধিতীয় পরমেশ্বরের নামোচ্চারণ করিত । প্রত্যহ এইরূপ অশেষ যন্ত্রণা ভোগ করিতে করিতে তাহার প্রাণ সংশয় অবস্থা উপস্থিত হইয়াছিল । বিলাল এই অবস্থায় একদিন আবুবকরের দৃষ্টিপথে পতিত হওয়ায় তিনি তাহাকে ক্ষম করিয়া তাহার জীবন রক্ষা করেন ।

একদিন মোহাম্মদ কাবা মন্দিরে উপবিষ্ট ছিলেন। সেই সময় মক্কার অন্যতম নেতা ওতবা তাঁহার নিকট গমন করিয়া বলিলেন, “মোহাম্মদ, তুমি কোরেশ সম্প্রদায় মধ্যে ভেদনীতি আনয়ন করিয়াছ, আমাদের ধর্মের নিন্দা করিতেছ, পূর্বপুরুষদিগকে পাষণ্ড বলিয়া ঘোষণা করিতেছ। তোমার উদ্দেশ্য কি? ধন, মান, যশ, প্রভুত্ব, রাজত্ব, তুমি কোন্ আকাজক্ষায় আমাদের বিদ্রোহাচরণে প্ররত্ত হইয়াছ? তোমার যাহা কামনা, তাহাই তোমার পদতলে বিলুপ্তি হইবে; এ বিদ্রোহাচরণ পরিত্যাগ কর।” ওতবার এই প্রলোভন বাক্যে মোহাম্মদ কিঞ্চিৎমাত্রও চাঞ্চল্য প্রকাশ করিলেন না। গম্ভীর ভাবে উত্তর করিলেন, “আমি তোমাদের ন্যায়ই একজন মনুষ্য মাত্র। আমি প্রত্যাদেশ লাভ করিয়াছি যে, ঈশ্বর এক এবং অদ্বিতীয়। তোমরা কোনদিকে দৃকপাত না করিয়া তাঁহাকে ভজনা কর, এবং যাহা গত হইয়াছে, তাহার নিমিত্ত অনুশোচনা কর। যাহারা পরলোক বিশ্বাস করে না এবং শাস্ত্রের নির্দেশ মত দান করে না, তাহারা দুঃখ পাইবে। কিন্তু যাহারা বিশ্বাসী ও সৎ-কর্মাধ্বিত, তাহারা পুরস্কার লাভ করিবে। হে ওতবা, তোমার নিকট সমস্ত প্রকাশ করা হইল; এখন

তুমি যে পথ শ্রেষ্ঠ বলিয়া বিবেচনা কর, তাহাই
অবলম্বন কর।”

উৎপীড়ন

কোরেশগণ মোহাম্মদকে প্রলোভনে বশীভূত করিতে
অসমর্থ হইয়া পুনরবার নববিশ্বাসীদের প্রতি ঘোর
উৎপীড়ন করিতে সঙ্কল্প করিল। তাহারা মোহাম্মদের
পবিত্র অঙ্গে হস্তার্পণ করিল। তার পর নানা প্রকারে
ইসলামধর্ম-বিশ্বাসীদেরকে উৎপীড়ন করিতে লাগিল।
তাহাদের পাশব অত্যাচারে অনেকের জীবন সংশয়াপন্ন
হইয়া উঠিল। মোহাম্মদ প্রাণাধিক শিষ্যবৃন্দকে তাদৃশ
দুর্দশাগ্রস্ত দেখিয়া, নাতিশয় মর্ম্মাহত হইলেন, এবং
তাহাদিগকে আবিসিনিয়া রাজ্যে আশ্রয় গ্রহণ করিয়া
কোরেশগণের পাশব অত্যাচারের হস্ত হইতে নিষ্কৃতিলাভ
করিতে আদেশ করিলেন। এই সময় যিনি
আবিসিনিয়া রাজ্যের অধিপতি ছিলেন, তিনি খৃষ্টধর্ম্মা-
বলম্বী, উদারস্বভাব ও ধর্ম্মাত্মা ছিলেন। এই জন্যই
মোহাম্মদ শিষ্যবৃন্দকে তাঁহার রাজ্যে আশ্রয় গ্রহণ করিতে
আদেশ করিয়াছিলেন। তাঁহার আদেশ অনুসারে ইসলাম-

ধর্ম ঘোষণার পঞ্চম বর্ষে বীরপুরুষ ওসমানইবনে-আফা-
নের নেতৃত্বে কিঞ্চিদধিক অশীতি সংখ্যক নরনারী
আবিসিনিয়া রাজ্যে গমন করিল। প্রতিহিংসাপরায়ণ
কোরেশগণ ঈদৃশ বহুসংখ্যক নববিশ্বাসীকে গ্রাসমুক্ত
দেখিয়া ক্রোধে গর্জ্জন করিতে লাগিল, এবং তাহাদিগকে
প্রত্যর্পণ করিতে অনুরোধ করিয়া আবিসিনিয়া রাজ-
দরবারে দূত প্রেরণ করিল। কোরেশ-দূত গৃহীত-আশ্রয়
মোসলমানদিগকে রাজ-দরবারে ধর্মদ্রোহী বলিয়া অভিযুক্ত
করিল। রাজা তাহাদিগকে সমবেত করিয়া জিজ্ঞাসা
করিলেন, “তোমরা কেন ধর্মাস্তর গ্রহণ করিয়াছ?”
আলীর কনিষ্ঠ ভ্রাতা জাফর সমাগত মোসলমানদের মুখ-
পাত্রস্বরূপ বলিতে লাগিলেন, “হে রাজনু, আমরা অজ্ঞান-
তিমিরাম্ভ্র বর্ষের ছিলাম; আমরা দেবদেবীর পূজক
ছিলাম, নিত্য ব্যভিচারে লিপ্ত হইতাম, মৃতদেহের মাংস
ভক্ষণ করিতাম, জঘন্য অশ্লীল বাক্যে জিজ্ঞাসা কলুষিত
করিতাম, মনুষ্যত্বে জলাঞ্জলি দিয়াছিলাম, আতিথ্যধর্ম
পালন করিতাম না। আমাদের এইরূপ দুর্দশার সময়
পরমেশ্বর আমাদের সমাজে একজন মহাপুরুষকে প্রেরণ
করিয়াছেন; এই মহাপুরুষের বংশমর্যাদা, সত্যবাদিতা,
সাধুতা এবং নির্মল চরিত্রের বিষয় আমরা সম্যক পরি-

জ্ঞাত আছি। তিনি আমাদিগকে একেশ্বরবাদ গ্রহণ করিতে আহ্বান করিয়াছেন এবং পরমেশ্বরের সহিত অন্য কোন পদার্থের সংযোগ সঙ্গত নহে বলিয়া শিক্ষা দিয়াছেন। তিনি আমাদিগকে দেবদেবীর অর্চনা করিতে নিষেধ করিয়াছেন এবং সত্য কথা কহিতে, ঋণ ধনের সদ্যবহার করিতে, দয়াদ্রুচিত হইতে, এবং প্রতিবাসীর স্বত্ব রক্ষা করিতে উপদেশ দিয়াছেন। তিনি আমাদিগকে নারীজাতির কুৎসা এবং অনাথা বালিকার অর্থ অপহরণ করিতে নিষেধ করিয়াছেন। তিনি আমাদিগকে পাপ হইতে দূরে গমন করিতে, দুষ্কার্য্য পরিত্যাগ করিতে, ঈশ্বরোপাসনা করিতে, দরিদ্রের উপকার করিতে, এবং পবিত্র দিনে উপবাস করিতে আদেশ করিয়াছেন।” আবিসিনিয়ার অধিপতি এই উত্তরে প্রীত হইয়া কোরেশ-দূতকে দরবার হইতে বহিষ্কৃত করিয়া দিলেন।

মোহাম্মদ ও “অতিপ্রাকৃত”

কিঞ্চিদধিক অশীতি সংখ্যক মোসলমান আত্মরক্ষার জন্ত আবিসিনিয়া রাজ্যে প্রস্থান করিলে মোহাম্মদের শিষ্যসংখ্যা খর্ব্ব হইয়া পড়িয়াছিল; কিন্তু ইহাতে তিনি

কিঞ্চিৎমাত্রও ভগ্নোদ্ধম না হইয়া পূর্ববৎ অটল ভাবেই ধর্মপ্রচার করিতেছিলেন। নববিশ্বাসীদের খর্বতা নিবন্ধন ইসলামধর্ম প্রচারের বিশ্ব উপস্থিত না হওয়ায় কোরেশগণ একান্ত ক্ষুব্ধ হইয়াছিল। এ কারণ তাহারা মস্তিষ্কের বহু আলোড়নে মোহাম্মদকে নিশ্চিহ্ন করিবার জন্য এক অভিনব পন্থা অবলম্বন করে। কোরেশগণ পূর্বগামী প্রেরিত মহাত্মাদের ন্যায় তাঁহাকেও অলৌকিক ক্ষমতা প্রদর্শন করিয়া নবধর্মের অপার্থিবতা প্রমাণিত করিতে বলিল। অলৌকিক ক্ষমতা প্রদর্শন মনুষ্যের সাধ্য নহে। মোহাম্মদ কখনও ঐশী শক্তির ভাগ করিয়া আত্মপ্রতিষ্ঠা করেন নাই। সত্যনিষ্ঠা তাঁহার চরিত্রের মূল-ভিত্তি ছিল। তিনি কোরেশগণের বিদ্রোহ বুদ্ধির হস্ত হইতে পরিত্রাণ লাভ করিলে অলৌকিক ক্ষমতা প্রদর্শন করিতে স্বীকৃত হইয়া প্রবঞ্চনার আশ্রয় গ্রহণ করিলেন না। মোহাম্মদ তাহাদিগকে মুক্তকণ্ঠে বলিলেন, “পরমেশ্বর আমাকে অলৌকিক ক্ষমতা প্রদর্শন জন্য প্রেরণ করেন নাই। তিনি আমাকে তোমাদিগকে ধর্মোপদেশ প্রদান করিতে প্রেরণ করিয়াছেন। প্রভু পরমেশ্বরের অপার মহিমা! আমি একজন ঈশ্বর-প্রেরিত ধর্মোপদেষ্টা ব্যতীত অন্য কেহ নহি। দেবদূতগণ সাধারণতঃ মর্ত্যে আগমন করেন না,

নতুবা পরমেশ্বর একজন দেবদূতকেই তোমানের নিকট তাঁহার নত্যা ধর্ম প্রচার করিতে প্রেরণ করিতেন । আল্লামার ভাণ্ডার আমার হস্তে ন্যস্ত, গুপ্ত তথ্য আমার জ্ঞানের বিষয়ীভূত, অথবা দেবদূতের আত্মা আমার দেহ সংযুক্ত, আমি কখনও এরূপ ঘোষণা করি নাই । ঐশ্বরিক রূপা ব্যতীত আমি নিজেই আমার আত্মশক্তিতে প্রত্যয় করিতে পারি না । পরম কারুণিক দয়ালু পরমেশ্বরের নামে বলিতেছি যে, স্বর্গমর্ত্যস্থ প্রাণীমাত্রেই সর্বজ্ঞান-ধার, সর্বশক্তিমান পরম পবিত্র প্রভুর মহিমা কীর্ত্তন করিয়া থাকে । প্রভু পরমেশ্বরই অজ্ঞান তিমিরাচ্ছন্ন আরবসমাজে আলোক প্রদান কল্পে তাঁহার প্রকৃত স্বরূপ সংস্থাপন এবং পরমজ্ঞান প্রচার জন্ত নিরঙ্কর আরবগণের মধ্য হইতে আমাকে ধর্ম-সংস্থাপকের পদে প্রতিষ্ঠিত করিয়াছেন । ইহা পরমেশ্বরের স্বেচ্ছাকৃত করুণা, তাঁহার ইচ্ছা হইলে সকলেই তাঁহার করুণা লাভ করিতে পারে । ঈশ্বর পরম দয়ালু ।” ফলতঃ মহাপুরুষ মোহাম্মদ কখনও অলৌকিক শক্তির মাহাত্ম্যে ইসলামধর্মকে আরবসমাজে প্রতিষ্ঠিত করেন নাই । তিনি জ্ঞান ও বিবেকের বর্জিত হস্তে কুসংস্কারবিদ্ধ আরবসমাজের অন্ধকারাশি ধ্বংস করিতে আবির্ভূত হইয়াছিলেন ; আরবগণের কুসংস্কার

পরিপুষ্ট করিয়া আত্মপ্রাধান্তের প্রতিষ্ঠা তাঁহার উদ্দেশ্য ছিল না। প্রকৃতির রুদ্র গম্ভীর “স্নেহমধুর মহোজ্জ্বল নৌন্দর্য্য” পরিস্ফুট ভাবে প্রদর্শন করিয়া পরমেশ্বরের প্রতি মানব হৃদয়কে অনুরক্ত করিবার উদ্দেশ্যেই মোহাম্মদ মহাসাধনায় সমস্ত জীবন ক্ষেপণ করিয়াছিলেন। একারণ তিনি কোরেশগণের কথামত অলৌকিক ক্ষমতার পরিচয় প্রদান করিতে স্বীকৃত হন নাই। কিন্তু তাহার। তাঁহার সরল বাক্যে সন্তুষ্ট না হইয়া তাঁহাকে বিবিধ প্রকারে বিদ্ৰূপ ও উৎপীড়ন করিতে আরম্ভ করে। তাহার। বলিয়াছিল, “হে মোহাম্মদ, নিশ্চয় জানিও যে, তোমার অথবা আমাদের বিনাশ না হইলে এ বিরুদ্ধাচরণ বিরাম লাভ করিবে না।”

কোরেশগণের অত্যাচারের মাত্রা অতিশয় বৃদ্ধি পাইল। মোহাম্মদ নিজে অশেষ প্রকারে নিগৃহীত হইতে লাগিলেন, তাঁহার শিষ্যবৃন্দের লাঞ্ছনা ও অপমানের পরিসীমা রহিল না। এই সময় একবার প্রলোভন মোহনবেশে মোহাম্মদের নিকট উপস্থিত হইয়াছিল। একদিন প্রার্থনাকালে মোহাম্মদ তিনজন চান্দদেবীর (অল্লাত, অলুউজ্জা এবং মলাত) উল্লেখ করিয়া জিজ্ঞাসা করিলেন, ইহাদের সম্বন্ধে তোমরা কি বিবেচনা কর? এই স্বকৃত

প্রশ্নের উত্তর তাঁহার মুখ হইতে নিঃসৃত হইবার পূর্বেই একজন পৌত্তলিক শ্রোতা বলিল, “ইহারা সমাদৃত দেবকুমারী,—ঈশ্বর-কৃপা লাভ করিবার জন্য সহায়তা করিতে পারেন।” মোহাম্মদ এই বাক্যের প্রতিবাদ না করিয়া ক্ষণকালের জন্য মোনাবলম্বী রহিলেন। শ্রোতৃবর্গ মোহাম্মদকে পৌত্তলিকের বক্রবাক্যে মোনাবলম্বী দেখিয়া সে বাক্য তাঁহার অভিপ্রেত বলিয়া বিবেচনা করিল, এবং আনন্দোৎফুল্লচিত্তে অদ্বিতীয় ঈশ্বরের মহিমাকীর্তনে প্ররম্ভ হইল। কিন্তু মহাপুরুষের মনুষ্যমূলভ দুর্বলতা বিদ্যুচ্ছটার ন্যায় মুহূর্ত্তমধ্যে বিলীন হইয়া গেল। তিনি পরমুহূর্ত্তেই বলিলেন, “তোমাদের দেবদেবী অন্তঃনারশূন্য নাম মাত্র। এই সকল দেবদেবী তোমাদের ও তোমাদের পূর্বপুরুষগণের মস্তিষ্কেই সৃষ্ট হইয়াছে।” মোহাম্মদ প্রলোভনে পতিত না হইয়া পুনর্বার কোরেশজাতির সমস্ত উৎপীড়ন অগ্নানবদনে নষ্ট করিতে প্রস্তুত হইলেন। কোরেশগণ তাঁহার ব্যবহারে একান্ত ক্ষুব্ধ হইল; তাহাদের অত্যাচার-স্রোত প্রবলবেগে প্রবাহিত হইল।

ওমরের দীক্ষা

কোরেশ সম্প্রদায়ের অন্যতম নেতা আবুজ্জহল মোহাম্মদকে হত্যা করিবার জন্য অনুচরদিগকে আদেশ করিলেন; এবং আজ্ঞাপ্রতিপালনকারীকে একশত লোহিত উষ্ট্র ও এক সহস্র রৌপ্য মুদ্রা পারিতোষিক দিতে প্রতিশ্রুত হইলেন। ওমর নামক অমিতবলশালী ধীসম্পন্ন কোরেশ মোহাম্মদের শিরশ্ছেদন করিতে প্রতিজ্ঞা করিয়া উন্মুক্ত ক্রুপাণ হস্তে ধাবিত হইলেন। কিয়দূর অগ্রসর হইয়াই তাঁহার ভগিনী ও ভগিনীপতির ইসলামধর্ম গ্রহণের সংবাদ অবগত হইলেন। এই সংবাদে ক্রোধোন্মত্ত হইয়া ওমর ভগিনীর গৃহে গমন করিলেন, এবং মৃতের স্মায় দিগ্বিদিকবোধশূন্য হইয়া ভগিনী ও ভগিনীপতিকে নির্দয়ভাবে প্রহার করিতে লাগিলেন। তাঁহার দারুণ প্রহারে তাঁহারা ক্ষতবিক্ষত হইলেন;—ক্ষতস্থান হইতে রক্তধারা বহিল। কিন্তু তাঁহারা নবধর্ম পরিত্যাগ করিতে সম্মত হইলেন না; বলিলেন, “আমরা সাক্ষ্য দিতেছি যে, পরমেশ্বর ব্যতীত উপাস্ত নাই এবং মোহাম্মদ তাঁহার প্রেরিত ও ভৃত্য।” ওমরও

তাহাদের ধর্মবিশ্বাসের দৃঢ়তা দেখিয়া বিস্মিত হইলেন । তিনি অপ্রতিভ হইয়া ভগিনীর বাটীতেই সে দিন যাপন করিতে মনন করিলেন । রাত্রিকালে তদীয় ভগিনীপতি কোরাণ পাঠ করিতে আরম্ভ করিলেন । ওমরের অশাস্তচিত্ত তাহাদের মধুর আরাধিতে আকৃষ্ট হইল ; তিনি মনোযোগ সহকারে কোরাণ পাঠ শুনিতে লাগিলেন । কোরাণের চিত্তবিমোহিনী বাণী শুনিতে শুনিতে তাহার হৃদয় অভিভূত হইয়া পড়িল ; তিনি ইসলামধর্মে বিশ্বাস স্থাপন করিলেন । মোহাম্মদকে দর্শন করিবার জন্য তাহার প্রাণ ব্যাকুল হইয়া উঠিল ; রাত্রি প্রভাত হওয়া মাত্র তিনি আরকমের গৃহাভিমুখে ছুটিয়া চলিলেন । মোহাম্মদ শিষ্যগণ সহ আরকমের (জনৈক শিষ্য) গৃহে অবস্থান করিতেছিলেন । তাহার শিরশ্ছেদন জন্য ওমরের ভীষণ প্রতিজ্ঞার সংবাদ ইতিপূর্বেই মক্কার সর্বত্র প্রচারিত হইয়াছিল । ওমর আসিয়া দ্বারে আঘাত করিলেন । শিষ্যগণ ওমরের আগমনে শঙ্কাকুল হইলেন । কিন্তু নির্ভীক মোহাম্মদ গৃহ হইতে বহির্গত হইয়া ওমরের সম্মুখে দণ্ডায়মান হইলেন । ওমর তাহাকে দেখিবামাত্র জলদগম্ভীরস্বরে বলিয়া উঠিলেন, “আমি সাক্ষ্যদান করিতেছি, পরমেশ্বর ব্যতীত উপাস্য নাই, এবং আপনি

হজরত মোহাম্মদ

তাহার প্রেরিত ও ভৃত্য।” অতঃপর তিনি বাষ্পরুদ্ধ-
কণ্ঠে তাহার হৃদয়ে যে আগুন জ্বলিতেছিল, তাহার
পরিচয় দিলেন। মোহাম্মদ ওমরকে সত্যধর্ম্মানুরক্ত
দেখিয়া একান্ত প্রীত হইলেন, এবং তাঁহাকে দৃঢ়
আলিঙ্গনে আবদ্ধ করিয়া ঈশ্বরের নামে জয়োচ্চারণ
করিলেন।

উৎপীড়ন

অমিতবলশালী ধৈর্য্যবান ওমর বিশ্বাসী দলভুক্ত
হওয়াতে তাহাদের ক্ষমতা বৃদ্ধিপ্রাপ্ত হইয়াছিল তাহাতে
সন্দেহ নাই। কিন্তু কোরেশগণ ইহাতে অত্যন্ত ক্ষুব্ধ
হইয়া তাহাদিগকে পূর্বাপেক্ষা প্রবলভাবে উৎপীড়ন
করিতে আরম্ভ করে। এই সময় কোরেশ-দূত
আবিসিনিয়া হইতে ফিরিয়া আসিল। কোরেশগণ
তাহার নিগ্রহের কথা শুনিয়া দাবানলের ন্যায় জ্বলিয়া
উঠিল; এবং তাদৃশ অবমাননার প্রতিশোধ লইবার জন্য
বিশ্বাসীদলের প্রতি অত্যাচারের মাত্রা দ্বিগুণ করিতে
বদ্ধপরিকর হইল।

হানিম ও মুতালিব বংশের!! অধিকাংশ লোকই

ইসলামধর্মাবলম্বী ছিলেন। এজন্য কোরেশগণ এই দুই বংশকে সমূলে বিনাশ করিতে সঙ্কল্প করিয়া তাঁহাদের সঙ্গে বৈবাহিক সূত্রে আবদ্ধ না হইতে ও তাঁহাদের নিকট ক্রয় বিক্রয় না করিতে পরস্পরে শপথ গ্রহণ পূর্বক অঙ্গীকারবদ্ধ হইল। মোহাম্মদ ঈদুশ উৎপীড়ন হইতে পরিত্রাণ লাভ জন্য আত্মীয়স্বজন সহ মক্কার নিকটবর্তী সেব আবুতামিব নামক গিরি-সঙ্কটে প্রস্থান করাই সঙ্গত বলিয়া অবধারণ করিলেন। তদনুসারে তাঁহারা স্ব স্ব গৃহ পরিত্যাগ করিয়া তথায় গমন করিলেন। এই স্থানে মোহাম্মদকে সশিষ্যে তিন বৎসর কাল অবরুদ্ধের স্মায় থাকিতে হইয়াছিল। এই তিন বৎসর কাল তাঁহাদের কষ্টের পরিসীমা ছিল না। যে সকল খাত্ত সামগ্রী তাঁহাদের সঙ্গে ছিল, তাহা নিঃশেষিত হইলে তাঁহারা নূতন করিয়া খাত্ত সামগ্রী সংগ্রহ করিতে পারেন নাই। কারণ, ইসলামধর্মবিরোধিগণ তাঁহাদের নিকট দ্রব্য বিক্রয় না করিবার জন্য অঙ্গীকারবদ্ধ ছিল। ক্ষুধার্ত শিশুর ক্রন্দনে চতুর্দিক মুখরিত হইয়া উঠে। শিশুর আর্তনাদও বিশ্বাসী-দলের হৃদয় চঞ্চল করিতে পারে নাই। কিন্তু মক্কার কতিপয় নেতা তাঁহাদের ঈদুশ দুর্দশা দর্শনে অনুভূত হইয়া আপনাদের ধর্মঘট স্নান করিতে যত্নশীল হইলেন।

তাঁহাদের যত্নে ইসলামধর্মবিশ্বাসিগণ মক্কায় বাসোপযোগী কতিপয় অধিকার লাভ করিলেন।

তদনুসারে তাঁহারা মক্কায় ফিরিয়া আসিলেন, কিন্তু শান্তিসুখ তাঁহাদের অদৃষ্টে ছিল না। তাঁহাদের প্রত্যাবর্তনের পর ইসলামধর্মবিরোধিগণ তাঁহাদের প্রতি পুনর্বার পূর্ববৎ উৎপীড়ন করিতে আরম্ভ করিল। মোহাম্মদ মক্কাবাসীদিগকে কোন ক্রমে নবধর্মের অনুরাগী করিতে না পারিয়া অভিনবক্ষেত্রে প্রচার করিলে সমধিক ফললাভ হইবে বলিয়া বিবেচনা করিলেন। এজন্য তিনি মক্কার নত্তর মাইল দূরবর্তী তায়েফ নগরে গমন করিলেন। এখানে তিনি প্রবলোৎসাহে ধর্মপ্রচার করিতে আরম্ভ করিলেন। কিন্তু এইস্থানে দীর্ঘকাল অবস্থান করিতে পারেন নাই। তত্রত্য পৌত্তলিক অধিবাসীরা বিদ্বেষবুদ্ধির বশবর্তী হইয়া তাঁহাকে নানা প্রকারে উৎপীড়ন করিতে আরম্ভ করে; এবং তাহাতে তিনি ক্ষুব্ধ হইয়া মক্কায় প্রত্যাবর্তন করেন।

* মোহাম্মদ তায়েফ নগর হইতে প্রত্যাগমন কালে পথিমধ্যে ভগ্ন হৃদয়ে যে প্রার্থনা করিয়াছিলেন, আমরা তাহার কিয়দংশ উদ্ধৃত করিতেছি।—“হে প্রভো, আমি দুর্বলতা ও আত্মভরিতাবশতঃ তোমার নিকট আমার দুঃখকাহিনী নিবেদন করিয়া থাকি।

মোহাম্মদের মদিনায় গমন

এই সময় মোহাম্মদের যশঃপ্রভা দেশ-বিদেশে বিকীর্ণ হইয়া পড়িয়াছিল। যে সকল বিদেশীয় লোক বাণিজ্য বা তীর্থভ্রমণ উপলক্ষে মক্কায় আসিত, তাহাদের অনেকে মোহাম্মদের প্রাণোন্মাদকর উপদেশে উদ্দীপিত হইয়া ইসলামধর্ম গ্রহণ করে। এই ভাবে ইসলাম-ধর্মের বীজ দেশ-বিদেশে সর্বত্র উগ্ধ হইয়াছিল। মোহাম্মদের তায়েফ নগর হইতে প্রত্যাবর্তনের অত্যন্ত দিন পরেই মদিনার দ্বাদশজন ক্ষমতামণ্ডলী

মহুম্বোর নিকট আমি নগণ্য। হে দুর্বলের বল পরমকারুণিক প্রভো, তুমি আমার নিয়ন্তা, তুমি আমাকে পরিত্যাগ করিও না। অপরিচিত বা শত্রুসমাকুল স্থানে আমাকে পরিত্যাগ করিও না। তুমি রুষ্ট না হইলে আমার কোন বিপদ নাই। তোমার জ্যোতিঃই আমার আশ্রয়স্থল; তোমার জ্যোতিঃতে সমস্ত অন্ধকার দূরীভূত হয়, এবং ইহকালে ও পরকালে শান্তি লাভ করা যায়। তুমি আমার প্রতি রুষ্ট হইও না। তোমার যেরূপ ইচ্ছা সেই ভাবে আমার বিপদ দূর কর। তোমার করুণা ব্যতীত শক্তি ও সাহায্য নাই।”

সম্ভ্রান্ত ব্যক্তি তাঁহার মহিমা শ্রবণে আকৃষ্ট হইয়া মক্কায আগমনপূর্ব্বক ইসলামধর্ম্ম গ্রহণ করেন। ইহার প্রতিগমনকালে মদিনায় ধর্ম্মপ্রচার করিবার জন্য একজন প্রচারক সঙ্গে লইয়া যান। ইহার চেষ্টায় মদিনায় ইসলামধর্ম্মের জ্যোতিঃ বিকীর্ণ হইয়া পড়ে ; এবং আপামর সকলেই ইসলামধর্ম্মের শরণাপন্ন হয়। এই ভাবে মক্কার বহির্ভাগে ইসলামধর্ম্মের প্রভাব ক্রমশঃ বৃদ্ধি প্রাপ্ত হয়।

কিন্তু মক্কার অধিবাসীরা মোহাম্মদের সহস্র উপদেশেও ইসলামধর্ম্মের মহিমা উপলব্ধি করিতে পারিল না। তাহাদের উৎপীড়নের মাত্রা ক্রমশঃ বৃদ্ধি পাইতে লাগিল। অবশেষে মোসলমানদের মক্কায বাস করা অসাধ্য হইয়া উঠিল। মোহাম্মদ নশিম্যে মদিনায় আশ্রয় লইতে ইচ্ছা করিলেন। মদিনার অধিবাসীরা মোহাম্মদ ও তাঁহার শিষ্যগণকে আনয়ন করিবার জন্য সত্তর জন সম্ভ্রান্ত ব্যক্তিকে মক্কায প্রেরণ করিলেন। মোহাম্মদ মোসলমানদিগকে ক্রমে ক্রমে মক্কা পরিত্যাগ করিয়া গুপ্তভাবে মদিনায় গমন করিতে আদেশ করিলেন। শত্রুসকুলস্থানে একজন মোসলমানকেও পরিত্যাগ করিয়া মোহাম্মদ নিজে নিরাপদ স্থানে গমন করিতে ইচ্ছুক ছিলেন না।

হজরত মোহাম্মদ

এজন্য তিনি সর্বশেষে মক্কা হইতে প্রস্থান করিবার সঙ্কল্প প্রকাশ করিলেন। তদীয় প্রিয়তম ধর্মবন্ধু আবুবকর ও আলী তাঁহাকে পরিত্যাগ করিয়া মদিনায় গমন করিতে অনভিলাষী হইয়া মক্কায় বাস করিতে লাগিলেন। ইহারা ব্যতীত বিশ্বাসীদলভুক্ত সকলেই মদিনায় প্রস্থান করিতে লাগিলেন। এইরূপ ক্রমিক প্রস্থানে মক্কানগর অচিরে মোসলমানশূন্য হইয়া পড়িল। অতঃপর মোহাম্মদ মদিনায় প্রস্থান জন্য উদ্যোগ করিলেন। ৬২২ খৃষ্টাব্দের রবি-অল্-আউয়ল (জুলাই) মাসের পঞ্চম দিবস (সোমবার) সমাগত হইল। রাত্রি প্রভাতে মোহাম্মদ মদিনাভিমুখে প্রস্থান জন্য প্রস্তুত হইলেন। এদিকে বিরুদ্ধবাদিগণ সেই রাত্রিতেই মোহাম্মদকে হত্যা করিতে ষড়যন্ত্র করিল। তাহারা আপনাদের পাপসঙ্কল্প কার্যোপরিণত করিবার জন্য মোহাম্মদের বাসগৃহ পরিবেষ্টন করিল। কিন্তু মোহাম্মদ তাহাদের ষড়যন্ত্রের বিষয় অবগত হইয়া তৎপূর্বেই আবুবকরের গৃহে প্রস্থান করিয়াছিলেন।

মোহাম্মদ আবুবকরের গৃহে উপনীত হইয়া তাঁহাকে সঙ্গে লইয়া সেই অন্ধকার রজনীতেই মদিনাভিমুখে প্রস্থান করেন। আবুবকর তাঁহাকে শত্রুর প্রথম আক্রমণ হইতে

রক্ষা করিবার জন্য কখনও তাঁহার সম্মুখবর্তী হইয়া কখনও পশ্চাদ্বর্তী হইয়া পথ চলিতে লাগিলেন। শত্রুর প্রথম আক্রমণ নিজের উপর আনয়ন করিবার উদ্দেশ্যেই তিনি এইরূপে পথ অতিবাহিত করিয়াছিলেন। মোহাম্মদের চরণে প্রস্তরের দারুণ আঘাত লাগিল, তিনি পদব্রজে চলিতে অক্ষম হইলেন। আবুবকর তাঁহাকে স্কন্ধে লইয়া চলিতে আরম্ভ করিলেন। তাঁহারা সৌর নামক সঙ্কীর্ণ গিরিগুহার নিকট উপনীত হইয়া সেখানে রাত্রিযাপন করিতে ইচ্ছা করিলেন। আবুবকর তন্মধ্যে প্রবেশ করিয়া উহা কোন প্রকার বিপদসঙ্কুল কি না, তাহা পরীক্ষা করিয়া দেখিলেন, এবং সেখানে বহুসংখ্যক ছিদ্র দর্শন করিয়া তৎসমুদয় পরিধেয় বস্ত্রদ্বারা বন্ধ করিয়া সর্পাদির আগমন পথ রুদ্ধ করিলেন। বস্ত্রখণ্ডের অল্পতানিবন্ধন একটি ছিদ্রপথ রুদ্ধ করিতে না পারিয়া তিনি সেখানে পদস্থাপন করিয়া বসিয়া রহিলেন। এইভাবে যথোচিত সতর্কতা অবলম্বন করিয়া আবুবকর মোহাম্মদকে আহ্বান করিলেন। মোহাম্মদ গুহার অভ্যন্তরে প্রবেশ করিয়া নিদ্রাভিভূত হইলেন; আবুবকর রাত্রি জাগরণ করিয়া প্রহরীর কার্যে নিযুক্ত রহিলেন। তিনি যে ছিদ্রপথে পদস্থাপন করিয়া রাখিয়াছিলেন, সে পথে এক রুশিক তাঁহাকে দারুণ

দংশন করিল, তিনি যন্ত্রণায় অস্থির হইয়া পড়িলেন ; কিন্তু মোহাম্মদকে জাগরিত না করিয়া সমস্ত নীরবে সঙ্করিতে লাগিলেন ।

এদিকে বিরুদ্ধবাদিগণ মোহাম্মদকে প্রাসমুক্ত দেখিয়া শোণিতলোলুপ ক্রুদ্ধ ব্যাঘ্রের ন্যায় তাঁহার অনুসন্ধান ধাবিত হইল, এবং তাঁহার পদাঙ্কের অনুসরণ করিয়া সৌরগুহার নিকট আনিয়া পঁছছিল। হজরত মোহাম্মদ ও আবুবকর তাহাদের পদশব্দ শ্রুতিতে পাইলেন । আবুবকর শঙ্কাকুল হইয়া বলিলেন, “আমরা দুইজন, শত্রুসংখ্যা বহু, আর রক্ষা নাই ।” মোহাম্মদ বলিলেন, “আমরা দুইজন নহি, তিনজন, ঈশ্বর আমাদের সঙ্গী, ঈশ্বর আমাদের রক্ষা করিবেন ।” আবুবকর ও মোহাম্মদের গুহার ভিতরে প্রবেশ করিবার অব্যবহিত পরেই উর্ণনভ উহার মুখে জাল পাতিয়াছিল, এবং বস্ত্র কপোত দ্বারমূলে ডিম্ব প্রসব করিয়া রাখিয়াছিল । গুহার মুখে জাল ও দ্বারমূলে ডিম্ব দেখিয়া শত্রুগণ উহার অভ্যন্তরে প্রবেশ না করিয়াই অন্য দিকে চলিয়া গেল, মোহাম্মদ ও আবুবকর রক্ষা পাইলেন । তাঁহারা তিন অহোরাত্র এই গুহার অভ্যন্তরে লুক্কায়িত রহিলেন । প্রতি রজনীতে আবুবকরের কন্ঠা দুই আনয়ন করিতেন ;

হজরত মোহাম্মদ

তঁাহারা এই দুষ্ক পান করিয়া ক্ষুণ্ণিরস্তি করিতেন। তঁাহারা চতুর্থ রজ্জনীতে সৌরগুহা পরিত্যাগ করিয়া মদিনাভিমুখে যাত্রা করিলেন। তঁাহারা রাত্রিকালে পথ অতিবাহিত করিতেন, সূর্য্যোদয় হইবামাত্র লুকাইত হইতেন। এইভাবে পথ অতিবাহিত করিয়া তঁাহারা চতুর্থ রজ্জনীতে মদিনার নিকটবর্তী কোবা নামক স্থানে উপনীত হইলেন। এখানে চারিদিন যাপন করিয়া মোহাম্মদ আবুবকরকে সঙ্গে লইয়া রবি-অলু-আউয়ল মাসের ষোড়শ দিবসে (শুক্রবার) মদিনায় প্রবেশ করিলেন।

মদিনায় মোহাম্মদ

মদিনার আপামর সাধারণ সকলেই মোহাম্মদের শুভাগমনে আনন্দে জয়ধ্বনি করিয়া উঠিল এবং তঁাহাকে মহাসমারোহে অভ্যর্থনা করিল। এখানে তঁাহার জীবনের নূতন অধ্যায় আরম্ভ হইল। মোহাম্মদ গল্ফায় বাসকালে স্বহস্তে নিজের পরিধেয় বস্ত্রের নংস্কার করিতেন, এবং এক একদিন অগ্নাভাবে অনাহারে থাকিতেন। তঁাহার জীবনের নূতন অধ্যায়েও এ বিষয়ে অবস্থান্তর ঘটে নাই।

কিন্তু তিনি কালক্রমে পৃথিবীর প্রবলতম সম্রাট অপেক্ষাও অধিক শক্তিশালী হইয়া উঠিয়াছিলেন।

মোহাম্মদ মদিনায় আগমন করিয়া সমস্ত অধিবাসীকে ইসলামধর্ম্মানুরাগী দেখিয়া তাঁহাদের ধর্ম্মচর্চার জন্য যথোপযুক্ত বন্দোবস্ত করিতে প্ররত্ত হইলেন। তিনি প্রথমেই একমাত্র অদ্বিতীয় নিরাকার পরমেশ্বরের উপাসনার জন্য মন্দির এবং গৃহতাড়িত মোসলমানদের জন্য বাসভবন নির্মাণ করিতে আরম্ভ করিলেন। তিনি স্বহস্তে মন্দিরের নির্মাণ কার্যে সাহায্য করিয়াছিলেন; এই ধর্ম্মমন্দির নৌষ্ঠবশালী ছিল না। মন্দিরের প্রাচীর ইষ্টক ও কর্দমের এবং ছাদ তালপত্রের ছিল। মন্দিরের একাংশ নিরাশ্রয় বক্তীগণের বাস জন্য নির্দিষ্ট ছিল। এই অনাড়ম্বর মন্দিরের প্রত্যেক অনুষ্ঠান বিনা জাঁকজমকে সম্পাদিত হইত। মোহাম্মদ কখনও আবরণহীন গৃহতলে দণ্ডায়মান হইয়া, কখনও বা একটি তালবৃক্ষে ভর দিয়া ব্যাকুল হৃদয়ে ধর্ম্মোপদেশ প্রদান করিতেন; এবং অল্পরক্ত শ্রোতৃবৃন্দ তাঁহার প্রাণোন্মাদকর উপদেশে আত্মহারা হইত।

এই সময় মদিনার অধিবাসিগণ দুই সম্প্রদায়ে বিভক্ত ছিল। এক সম্প্রদায়ের নাম আউস, অপর সম্প্রদায়ের

নাম খজরাজ । এই সম্প্রদায়দ্বয়मध्ये ঘোর অসন্তোষ ছিল, তাহারা একে অশ্রের রক্তপাত জন্য সর্বদা প্রস্তুত থাকিত । আউস ও খজরাজগণ ধর্ম-বিশ্বাসের গুণে আপনাদের চিরাগত শত্রুতা বিস্মৃত হইয়া ইসলামধর্মের পতাকামূলে মিলনের মোহন-মন্ত্রে সমবেত হইল । মোহাম্মদ মদিনাবাসীদের সমস্ত বিবাদে নিরসন করিয়া তাহাদিগকে একসূত্রে সন্ধিবদ্ধ করিলেন । তারপর এই সম্মিলন সুদৃঢ় করিবার উদ্দেশ্যে তাহাদিগকে এক সাধারণ উপাধিতে ভূষিত করা হইল । এই উপাধির নাম আনসার । আনসার শব্দের অর্থ সহায়তাকারী । মদিনাবাসীরা সঙ্কটকালে ইসলামধর্মের সহায়তা করিয়াছিল বলিয়া এই গৌরবসূচক উপাধি লাভ করিল । যে সকল মক্কাবাসী স্বধর্ম রক্ষার জন্য স্বর্গাদপি গরীয়সী জন্মভূমি এবং স্নেহ-মমতার পীঠস্থান গৃহ পরিত্যাগ করিয়া আসিয়াছিল, তাহাদিগকে মহজ্জরিণ (নির্বাসিত) উপাধি প্রদত্ত হইল । মোহাম্মদ মহজ্জরিণ ও আনসারদের মধ্যে অচ্ছেদ্য বন্ধন সংস্থাপন জন্য তাহাদিগকে লইয়া ধর্মমণ্ডলীর প্রতিষ্ঠা করিলেন । মণ্ডলীর বিশ্বাসীমাত্রেরি ভ্রাতৃত্বাবে অনুপ্রাণিত এবং সুখে দুঃখে একসূত্রে সন্ধিবদ্ধ হইল ।

ইসলাম এবং রাজশক্তি

মোহাম্মদ নবপ্রতিষ্ঠ ধর্মমণ্ডলীকে একমাত্র ধর্মবলে অনুবিদ্ধ করিয়া ক্ষান্ত রহিলেন না। একমাত্র অদ্বিতীয় নিরাকার পরমেশ্বরের উপাসনার প্রতিষ্ঠা, পাপে আকণ্ঠ-নিমজ্জিত আরবসমাজের উদ্ধার এবং বহুধা-বিভক্ত আরব জাতির ঐক্য-বন্ধন মোহাম্মদের জীবনের উদ্দেশ্য ছিল। এই উদ্দেশ্য সাধন কল্পে কেবল ধর্মবলই যথেষ্ট ছিল না, রাজশক্তিরও প্রয়োজন ছিল। দুর্দৈর্ঘ্য আরব জাতিকে ইসলামধর্মমূলক নৈতিক ও সামাজিক অনুশাসনের সম্যক্ অনুগত করিবার জন্য রাজশক্তির প্রয়োজন ছিল। এজন্য মোহাম্মদ নবপ্রতিষ্ঠিত ধর্মমণ্ডলীকে রাজশক্তি-সম্পন্ন করিয়া এক প্রজাতন্ত্র রাজ্যের সূত্রপাত করিলেন। কোন স্থানের অধিবাসিগণ কর্তৃক ইসলামধর্ম পরিগৃহীত হইলেই সে স্থানকে এই মণ্ডলীর শাসনাধীন করিবার নিয়ম বিধিবদ্ধ হইল। মোহাম্মদ আপনাকে মণ্ডলীর অধিনেতৃপদে প্রতিস্থাপিত করিলেন। তিনি এইরূপে একাধারে ধর্ম-

সংস্থাপক, শাসনকর্তা, অধিনেতা, অধ্যাপক ও বিচারক হইলেন । *

এই সময় মদিনা ও তাহার চতুঃপার্শ্ববর্তী স্থানসমূহে বহুসংখ্যক ইহুদির বাসভূমি ছিল । এই সময় ইহুদি

* নবধর্মের প্রতিষ্ঠা করিয়া মানবজাতির কল্যাণ সাধন করাই মোহাম্মদের জীবনের উদ্দেশ্য ছিল । রাজ্য-লালসা কখনও তাঁহার হৃদয় অধিকার করে নাই, নবধর্মের সর্বদ্বন্দ্বীন প্রতিষ্ঠার জন্য আবশ্যক বলিয়াই তিনি এক অভিনব সাম্রাজ্যের পত্তন করিয়াছিলেন । তাঁহার জায় সংসারনির্লিপ্ত মহাপুরুষ এ পৃথিবীতে অতি বিরল । মোহাম্মদের আশ্চর্য্য বৈরাগ্য ছিল । মৃতন সাম্রাজ্যের প্রতিষ্ঠাতা মোহাম্মদ একদা তদীয় প্রিয়তমা কন্যা ফতেমার গৃহে গমন করেন । এই সময় ফতেমা অস্বাভাবে তিন দিন উপবাস-ক্লিষ্ট ছিলেন । প্রিয়তমা কন্যার মুখে এই দুঃস্বাদ কথ্য শুনিয়া মোহাম্মদ ধীরচিত্তে বলিলেন, “ফতেমা, দুঃখিত হইও না ; তোমার পিতাও অল্প চারিদিন উপবাস-ক্লিষ্ট ।” এই বলিয়া তিনি গাত্রাবরণ উন্মোচন করিয়া ক্ষুধার যন্ত্রণা উপশম করিবার জন্য উদরে যে প্রস্তরখণ্ড বন্ধন করিয়া ছিলেন, তাহা প্রদর্শন করেন । আমরা আর একটি ঘটনার উল্লেখ করিতেছি । একদিন মোহাম্মদ দিবাভাগে মোটা দড়ির জাল-বোনা খাটিয়ার উপর বিনা শয্যায় শয়ন করিয়া নিদ্রিত হইয়াছিলেন । ঐ সন্ধ্যা মোটা দড়ির স্পর্শে তাঁহার কোমল অঙ্গে রক্তাভ দাগ

হজরত মোহাম্মদ

কৈনুকা, বনি নজির, কুরেজা প্রভৃতি নানা সম্প্রদায়ে বিভক্ত ছিল। মোহাম্মদ ইহুদিদিগকে সম্বন্ধে করিতে উত্তোগী হইয়া তাহাদের সঙ্গে সন্ধি সংস্থাপন করিলেন। এই সন্ধি অনুসারে মোহাম্মদ তাহাদিগকে স্বচ্ছন্দভাবে স্ব স্ব ধর্মকর্মের অনুষ্ঠান করিতে অনুমতি দিলেন; এবং ইহুদিরাও মোসলমানদের সঙ্গে সর্বপ্রকার শত্রুতা-চরণে বিরত থাকিতে অঙ্গীকার করিল। ইসলামধর্মের সঙ্গে তাহাদের ধর্মমতের প্রভূত পার্থক্য ছিল। একারণ তাহারা মোহাম্মদের প্রতি কিছুতেই সম্বন্ধ হইতে পারিল না। মোহাম্মদের উদার ব্যবহার নিবন্ধন ইহুদিগণ প্রকাশ্যভাবে তাঁহার সঙ্গে সহ্যবহার করিতে আরম্ভ করিল, কিন্তু তাহাদের অন্তরে অন্তরে বিদ্বেষভাব পরিপুষ্ট হইতে লাগিল।

মদিনাবাসীর প্রাণগত আনুকূল্যনিবন্ধন ইসলামধর্মের

পড়িয়াছিল। ওমর তাঁহাকে এই অবস্থায় দেখিয়া অশ্রুজল সংবরণ করিতে পারেন নাই। মোহাম্মদ জাগরিত হইয়া তাঁহার অশ্রুজল মোচনের কারণজিজ্ঞাসু হন। তিনি ওমরের কথা শুনিয়া বলেন, “ইহকালের সুখ আমার লক্ষ্য নহে, আমি পরলোকের সম্পদপ্রার্থী। তুমি কি ইহা ইচ্ছা কর না?”

মূল সুদৃঢ় হইয়া উঠিল ; এবং মোহাম্মদ জ্বলন্ত উৎসাহে আরব দেশের সর্বত্র একেশ্বরবাদের মহিমা ঘোষণা করিতে আরম্ভ করিলেন । তাঁহার প্রচার ফলে বহুস্থানের অসংখ্য নরনারী পৌত্তলিকতা পরিত্যাগপূর্ব্বক একেশ্বরবাদে দীক্ষিত হইয়া মদিনার ধর্ম্মমণ্ডলীর আশ্রয় গ্রহণ করিতে লাগিল । ইহাতে প্রত্যহ মোহাম্মদের প্রভাব ও প্রতিপত্তি বৃদ্ধি পাইতে লাগিল । একারণ কোরেশদের ক্ষোভের সীমা রহিল না । তাহারা মোহাম্মদকে ধ্বংস করিবার জন্য বদ্ধপরিকর হইল । মদিনাবাসী ইহুদিদের ইসলাম-ধর্ম্ম-বিদ্বেষের কথা মক্কায় অপরিজ্ঞাত ছিল । অনেকেশ্বরবাদী কোরেশেরা একমেবাদ্বিতীয় পরমেশ্বরের উপাসক মোহাম্মদের ধ্বংস কামনায় ষড়যন্ত্র করিবার জন্য একেশ্বরবাদী ইহুদিদের নিকট দূত প্রেরণ করিতে আরম্ভ করিল, একারণ মোহাম্মদ আশ্রয়দাতা শিশুবৃন্দের রক্ষার জন্য উৎকণ্ঠিত হইলেন ।

যুদ্ধের সূচনা

কিছুতেই কোরেশদের উৎপীড়নের নিরুত্তি না দেখিয়া, মোহাম্মদ বুঝিতে পারিলেন যে, অস্ত্রবলের প্রয়োগ ব্যতীত দেশব্যাপী শত্রুতাচরণের মূলোচ্ছেদ করিবার অন্য উপায় নাই এবং তরবারি হস্তে অগ্রসর না হইলে দেশমধ্যে শান্তির প্রতিষ্ঠা সম্ভবপর নহে। মোহাম্মদের নিজের স্বভাব রক্তপাতের বিরোধী ছিল। তারপর মুসলমানগণ শান্তির অভিলাষী হইয়াছিলেন। তাঁহারা মক্কায় নিপীড়নের একশেষ সহ্য করিয়া মদিনায় আগমন করেন। এখানে শান্তির মৃত্তাহিল্লোলে তাঁহাদের সমস্ত আলায়দ্রণা উপশমিত হয়। তাঁহারা সে শান্তি পরিত্যাগ-পূর্বক অশেষবিধ ক্লেশপূর্ণ যুদ্ধে নিরত হইতে ইচ্ছুক ছিলেন না। মদিনাবাসিগণ মোহাম্মদ ও তদীয় শিষ্য-বৃন্দকে আশ্রয় প্রদান করেন। কেহ অগ্রগামী হইয়া তাঁহাদিগকে আক্রমণ করিতে উত্তত হইলে, মদিনাবাসিগণ সে শত্রুর গতিরোধ করিতে প্রতিশ্রুত ছিলেন; কিন্তু মোহাম্মদ বিনা কারণে অস্ত্রধারণ করিলে তাঁহারা তাঁহার অনুকূলে দণ্ডায়মান হইবেন না বলিয়াই ধার্য্য

ছিল। * ফলতঃ, কি মোহাম্মদের নিজের স্বভাব, কি মোসলমানগণের মতি গতি, কি মদিনাবাসীদের সঙ্গে সন্ধিবন্ধন, সমস্তই অস্ত্রধারণের প্রতিকূল ছিল। এ কারণ, মোহাম্মদ যাহাতে বিনারক্তপাতে নিরাপদ হইতে পারেন, তজ্জন্য নানারূপ যত্ন করেন।† কিন্তু কিছুতেই শত্রুতাচরণ বিদূরিত করিতে না পারিয়া কোরেশদের বিরুদ্ধে অস্ত্র-

* The people of Medina were pledged only to defend the Prophet from attack, not to join him in any aggressive steps against the Koreish.—*Muir's Life of Mahomed.*

† আমাদের কথার সমর্থন জন্য নিম্নে কোরাণ হইতে দুইটি বচন উদ্ধৃত হইল—

“পরন্তু তাহারা নিবৃত্ত রহিলে নিশ্চয় ঈশ্বর ক্ষমাশীল ও দয়ালু। ১৮৯। ** যদি তাহারা নিবৃত্ত হয়, তবে অত্যাচারী ব্যতীত হস্তক্ষেপ করিতে নাই। ১৯০, দ্বিতীয় সূরা। (গিরিশ বাবুর অম্ববাদ) ** যদি নিবৃত্ত হও (হে মক্কাবাসীগণ,) তবে তাহা তোমাদের জন্য মঙ্গল। ১৯। যাহারা অত্যাচার করিয়াছে, তাহাদিগকে বল, যদি তাহারা অত্যাচার হইতে নিবৃত্ত হয়, তবে যাহা গত হইয়াছে, তাহাদের জন্য ক্ষমা করা যাইবে।” ৩৯, অষ্টম সূরা।

এইরূপ আরও অনেক বচন উদ্ধৃত করা যাইতে পারে।

ধারণ করিতে বাধ্য হইলেন, এবং তদনুরূপ প্রত্যাদেশও লাভ করিলেন । *

প্রথম যুদ্ধ

অতঃপর মোহাম্মদ যুদ্ধায়োজনে প্ররুত্ত হইলেন । কোরেশেরাও উদাসীন রহিল না, দিবারাত্রি পরিশ্রম করিয়া অস্ত্রশস্ত্র সংগ্রহ করিতে লাগিল । এই উত্তোগ-পর্ককালে মোহাম্মদ বিদেশগামী কোরেশ বণিক্দিগকে

* যাহারা সাংসারিক জীবনকে পরলোকের জন্য বিক্রয় করে, তাহাদের উচিত যে ঈশ্বরের পথে সংগ্রাম করিতে থাকে এবং যে ব্যক্তি ঈশ্বরের পথে সংগ্রাম করিয়া জয়ী বা হত হয়, পরে আমি তাহাকে শীঘ্র মহা পুরস্কার দান করি । ৭৪ । অতএব (হে মোহাম্মদ) পরমেশ্বরের পথে সংগ্রাম কর, তুমি জীবনে ব্যতীত প্রাপ্তিভিত্তি হইবে না, বিশ্বাসিগণকে উত্তেজিত কর, সত্বরেই ঈশ্বর কাফেরদিগের সম্মুখ বন্ধ করিবেন । ঈশ্বর যুদ্ধ বিষয়ে সূদৃঢ় ও শান্তি বিষয়ে সূদৃঢ় । ৮৪ । চতুর্থ সূরা । (গিরিশ বাবুর কোরাণের বঙ্গানুবাদ ।)

আক্রমণ করিবার জন্য সাতবার সৈন্য প্রেরণ করিয়া-
ছিলেন। এই সকল যুদ্ধযাত্রা সামান্য ছিল। প্রথম
অভিযানে যুদ্ধ হয় নাই, মোসলমানগণ কোরেশদের সঙ্গে
সন্ধি সংস্থাপন করিয়া মদিনায় ফিরিয়া আইসেন। দ্বিতীয়
অভিযানে মোসলমানগণ কোরেশ বণিকদের সম্মুখবর্তী
হইলে তাহারা ভয় পাইয়া পলায়ন করে।

তৃতীয়, চতুর্থ ও পঞ্চমবার মোসলমানগণ কোরেশ
বণিকদের আগমন সংবাদ পাইয়া মদিনা হইতে বহির্গত
হয়। কিন্তু প্রতিবারেই তাহাদের পঁছরিবার পূর্বেই
কোরেশেরা চলিয়া যায়, এবং তাহারা বিনাযুদ্ধে মদিনায়
ফিরিয়া আইসে। একদল মক্কাবাসী মদিনার প্রান্ত হইতে
উষ্ট্র সকল অপহরণ করিয়া লইয়া যাওয়ায় মষ্ঠ অভিযান
করা হয়। এবারও মোসলমানদের পঁছরিবার পূর্বেই
কোরেশেরা চলিয়া গিয়াছিল। সপ্তম অভিযানে বতনন
খোলা নামক স্থানে মোসলমানদের সঙ্গে একদল কোরেশ
বণিকের যুদ্ধ হয়। এই যুদ্ধে কোরেশেরা সম্পূর্ণরূপে
পরাস্ত হয়, এবং মোসলমানগণ তাহাদের সমস্ত পণ্যদ্রব্য
হস্তগত করে। এই যুদ্ধ রজব মাসে সংঘটিত হইয়াছিল।
তৎকালের আরবসমাজে রজব মাসে যুদ্ধ করা অত্যন্ত
গহিত কাজ বলিয়া পরিগণিত ছিল। এজন্য রজব মাসে

যুদ্ধ হওয়াতে মোহাম্মদের বড় নিন্দাবাদ হয়। কিন্তু এই যুদ্ধে তাঁহার সম্পত্তি ছিল না। যুদ্ধকর্তৃগণ মদিনায় প্রত্যাবৃত্ত হইলে মোহাম্মদ তাহাদিগকে যথেষ্ট তিরস্কার করিয়াছিলেন। তিনি লুণ্ঠিত ডব্বোর কিঞ্চিৎমাত্রও গ্রহণ করেন নাই। *

* মোসলমানগণ বিদেশযাত্রী কোরেশ বণিকদিগকে আক্রমণ করিয়া অপকার্যের অনুষ্ঠান করিয়াছিলেন কিনা ? এ প্রশ্নের উত্তরে চেরাগ আলী যাহা লিখিয়াছেন, আমরা এখানে তাহার সারমর্ম প্রদান করিতেছি। কোরেশদের তাড়নায় মোসলমানগণ মক্কা পরিত্যাগ করিতে বাধ্য হয়। কোরেশেরা তাহাদিগকে বলপূর্বক জন্মভূমি হইতে নির্বাসিত করিয়াছিল, এক্ষণে নির্দেশ করা যাইতে পারে। সুতরাং মোসলমানগণ তাহাদের বিরুদ্ধে অস্ত্রধারণ করিতে অধিকারী ছিল। Wheaton's Elements of International Law নামক গ্রন্থানুসারে এক রাজ্যের সঙ্গে অন্য রাজ্যের যুদ্ধ উপস্থিত হইলে শত্রুর সম্পত্তি অপহরণ করিয়া তাহা রাজকোষে সংগ্ৰহ করা অথবা দৈনিক শ্রেণীর মধ্যে বিভাগ করিয়া দেওয়া যুদ্ধনীতির প্রথম সূত্রানুসারে। সম্পত্তি অপহরণ কালে স্থানাস্থান অথবা আকার প্রকার কিছুই বিচার করিবার প্রয়োজন নাই। কি প্রাচীন, কি আধুনিক উভয়বিধ যুদ্ধশাস্ত্রেই এইরূপ মত পরিদৃষ্ট হইয়া থাকে। তৎকালে মক্কার শাসনপ্রণালী Patriarchal ছিল।

বতনন খোলার যুদ্ধের অব্যবহিত পরেই মোহাম্মদ যুদ্ধোপকরণ সংগ্রহকারী একদল কোরেশ বণিক্কে আক্রমণ করিতে সসৈন্তে যাত্রা করেন। দ্বিতীয় হিজরীর (৬২৩ খঃ) রমজান মাসের দ্বাদশ দিবসে উভয় দল বদর নামক স্থানে পরস্পরের সম্মুখবর্তী হইল। কোরেশ বণিকেরা শত্রুর আগমন সংবাদ অবগত হইয়া পূর্বেই

মক্কার কোন নির্দিষ্ট সৈন্য ছিল না। আবশ্যকমত সকলেই তরবারী হস্তে যুদ্ধক্ষেত্রে উপস্থিত হইত। স্মৃতরাং বিবাদ আরম্ভ হইবার পর প্রত্যেক মক্কাবাসী মোসলমানের শত্রু হইয়াছিল। একারণ মোসলমানগণ বাণিজ্য-ব্যবসায়ী বিদেশযাত্রী কোরেশ-দিগকে আক্রমণ ও তাহাদের সম্পত্তি অপহরণ করিবার অধিকারী ছিল। এই সকল অভিযানকে পরস্পর অপহরণের বাসনায় সৈন্ত প্রেরণ রূপে নির্দেশ করা সম্ভব নহে। বস্তুতঃ মোহাম্মদ আত্মরক্ষার জন্ত কোরেশদের বিরুদ্ধে যে যুদ্ধ ঘোষণা করিয়াছিলেন, এই সকল অভিযান তাহার অংশ মাত্র ছিল। মদিনায় আশ্রয়গ্রহণ করিবার সময় মোসলমানগণ লুণ্ঠনকার্য্য হইতে বিরত থাকিতে প্রতিজ্ঞাবদ্ধ হইয়াছিল। তাহারা এ প্রতিজ্ঞার বিরুদ্ধে কাজ করিলে তাহা লইয়া অবশ্যই প্রতিবাদ হইত। এই সকল অভিযানে মদিনাবাসীও গমন করিত। তাহারা আততায়ীরূপে যুদ্ধে যোগ দিবে না বলিয়াই ধার্য্য ছিল।

হজরত মোহাম্মদ

মক্কায় সংবাদ প্রেরণ করিয়াছিল। সংবাদ পাইয়া অবিলম্বে একসহস্র বীরপুরুষ তাহাদের সাহায্যার্থ বদরে আসিয়া উপনীত হইল। মোহাম্মদের সঙ্গে কেবলমাত্র তিনশত পাঁচজন বোদ্ধা ছিল। কিন্তু তিনি শত্রুর সংখ্যাধিক্য নিবন্ধন ভীত হইলেন না, ঈশ্বরের নাম স্মরণ করিলেন। তুমুল যুদ্ধ আরম্ভ হইল। কোরেশ সৈন্য মোসলমানের প্রবলপরাক্রম সহ্য করিতে না পারিয়া ছিন্ন ভিন্ন হইয়া গেল। মোহাম্মদ জয়শ্রীলাভ করিয়া সপ্ততিজন বন্দীসহ মদিনায় প্রত্যাবর্তন করিলেন

* আইরভিং প্রভৃতি লেখকগণ নির্দেশ করিয়াছেন যে, কোরেশ-বণিকদের ধন লুণ্ঠনের জন্তই মোহাম্মদ বদরের যুদ্ধ করিয়াছিলেন। আমির আলী প্রভৃতি মোসলমান-লেখকগণের মতে, কোরেশেরা মোসলমানদিগকে পয়সা দিয়া করিবার জন্ত মদিনা আক্রমণ করিতে অগ্রসর হওয়াতেই বদরের যুদ্ধ সংঘটিত হয়। আমরা গিরিশ বাবুর গ্রন্থ পাঠ করিয়া জানিতে পারি যে, মোহাম্মদের সমসময়ে একদল মদিনাবাসীর বিশ্বাস ছিল যে, তিনি অর্থ লোভেই বদরের যুদ্ধ করিয়াছিলেন। কতিপয় মদিনাবাসী যুদ্ধ করিবার জন্ত মোহাম্মদের সহিত মদিনা হইতে বহির্গত হইয়াছিল, কিন্তু কিয়দূর গমন করিয়াই প্রাণ্ডপ্ত বিশ্বালের বশবর্তী হইয়া যুদ্ধ না করিয়াই মদিনায় প্রত্যাবর্তন করে। কয়স নামক একজন বীরপুরুষ যুদ্ধ করিবার জন্ত মোহাম্মদের

হজরত মোহাম্মদ

মোহাম্মদ মদিনায় প্রত্যাবৃত্ত হইয়াই কোরেশ বন্দীদিগকে মুক্তি প্রদান করিলেন। মোসলমানগণ বন্দীদের সঙ্গে যথেষ্ট সদ্যবহার করিয়াছিলেন। তাহারা পদব্রজে চলিয়া বন্দীদের কষ্ট নিবারণের জন্য অশ্ব দিত, নিজেরা খর্জুর দ্বারা উদরপূর্তি করিয়া তাহাদের তৃণ্ডির জন্য রুটী সংগ্রহ করিত। মোহাম্মদ বদরের যুদ্ধে অল্পসংখ্যক নৈমন্ত লইয়া বহুসংখ্যক কোরেশ-নৈমন্ত পরাজিত করিয়াছিলেন।

সঙ্গে বহির্গত হয়। মোহাম্মদ তাহাকে জিজ্ঞাসা করেন, “তুমি কিজন্ত যুদ্ধ করিতে ইচ্ছা করিয়াছ?” কয়স উত্তর করে, “মকায় বণিবদের পণ্যদ্রব্যই আমাকে যুদ্ধে ব্রতী করিয়াছে।” কয়স ইসলাম-ধর্ম বিখ্যাসী ছিল না; এজন্য মোহাম্মদ তাহাকে ফিরাইয়া দেন। মোহাম্মদের অর্থলাভ এ যুদ্ধের কারণ নহে, বিরোধী কোরেশদিগকে দমন করিয়া মোসলমানদিগকে নিরাপদ করিবার জন্তই তিনি বদরের যুদ্ধক্ষেত্রে অবতীর্ণ হইয়াছিলেন, এরূপ সমসাময়িক প্রমাণের অভাব নাই। এই যুদ্ধের প্রাকালে মোহাম্মদ সহচর বন্ধুগণের মত জিজ্ঞাসা করেন। আবুবকর তাঁহার প্রশ্নের উত্তরে বলেন, “কোরেশদলপতিরা কখনও ইসলামধর্ম গ্রহণ করিবে না এবং সর্বদা অন্যের ধর্মাচরণে ব্যাঘাত জন্মাইবে। একারণ তাহাদের সঙ্গে যুদ্ধ করাই শ্রেয়ঃ।” আবুবকর মোহাম্মদের একান্ত অন্তরঙ্গ ছিলেন। মোহাম্মদের কোন মনোভাব আবুবকরের নিকট লুক্কায়িত থাকিবার সম্ভাবনা ছিল না।

ইহাতে মোসলমানদের ধর্মবিশ্বাস সুগভীর হইল। ইসলাম-ধর্ম ও তাহার প্রতিষ্ঠা ঈশ্বরেরই বিধান বলিয়া তাহাদের সুদৃঢ় প্রতীতি জন্মিল। তাহারা ধর্মের জন্ত জীবন পণ করিল। ফলতঃ, মোসলমানেরা বদরের যুদ্ধক্ষেত্রে জয় লাভ করিয়া সমধিক দুর্জয় হইয়া উঠিল।

কোরেশেরা যুদ্ধে পরাজিত হইয়া অপमानে স্থলিতে লাগিল, এবং অপমানের প্রতিশোধ লইবার কল্পনায় দুই-শত অশ্বারোহী সৈন্য গুপ্তভাবে মদিনায় গমন করিয়া মোসলমানদিগকে নিগ্রহ করিতে আরম্ভ করিল। মোসলমান বীরপুরুষগণ কোরেশদের আগমনের সংবাদ পরিশ্রুত হইয়া রণসজ্জা পরিধান পূর্বক বহির্গত হইল। কোরেশ সৈন্য তাহাদিগকে দর্শন করিয়া ভয়বিহ্বলচিত্তে পৃষ্ঠভঙ্গ দিল। মোসলমানগণ পলায়মান সৈন্যের পশ্চাদ্ধর্ত্তা হইল।*

* এই অমুসরগকালে একদা মোহাম্মদ শিবির হইতে কিয়দূরে একাকী একটি বৃক্ষের তলে শয়ন করিয়াছিলেন। ডারখার নামক একজন অমিতবলবান দুর্দান্ত কোরেশ তাঁহাকে তদবস্থায় আক্রমণ করে, এবং তাঁহাকে বধ করিবার জন্ত তরবারি নিক্ষেপিত করিয়া বলে, “হে মোহাম্মদ, এখন তোমাকে কে রক্ষা করিবে?” কিন্তু

ক্ষুদ্র ক্ষুদ্র অভিযান

কোরেশেরা ক্রমাগত দুইবার এই ভাবে পরাজিত হইয়া কিছুকালের জন্য শত্রুতাচরণ পরিত্যাগ পূর্বক নীরব হইল। বদরের যুদ্ধে মোহাম্মদ জয়শ্রী লাভ করাতে ইসলাম-বিদ্বেষী ইহুদীদিগের ক্ষোভের পরিসীমা রহিল না। তাহারা নানা প্রকারে মোগলমানের সঙ্গে শত্রুতাচরণ করিতে আরম্ভ করিল। তাহারা মোহাম্মদ এবং ইসলামধর্মকে লোকের নিকট অবজ্ঞাত করিবার অভিপ্রায়ে বিদ্রূপাত্মক কবিতার প্রচার করিতে আরম্ভ

মোহাম্মদ কিঞ্চিন্নাত্র ভীত না হইয়া বজ্রকঠোর স্বরে উত্তর করেন, “ঈশ্বর”; এই উত্তরে ডারথারের হৃদয় কম্পিত হইয়া উঠিল, তরবারি তাহার হস্ত হইতে খসিয়া পড়িল। মোহাম্মদ বিদ্যুৎবেগে সে তরবারি তুলিয়া লইয়া তাহাকে জিজ্ঞাসা করেন, “এখন তোমাকে কে রক্ষা করিবে?” ডারথার ভয়ে কাঁদিতে কাঁদিতে বলিল, “আমার আর কেহ নাই, তুমি আমাকে রক্ষা কর।” মোহাম্মদ তাহাকে ক্ষমা করিলেন, তাহার তরবারি তাহাকে ফিরাইয়া দিলেন। ডারথার ইসলামধর্ম গ্রহণ করিল।

করিল। কবি নামক একজন ইহুদি মক্কানগরে গমনপূর্বক যুদ্ধক্ষেত্রে নিহত কোরেশ-বীরদের শৌর্যবীর্যের কাহিনী গৃহে গৃহে প্রচার করিয়া তাহাদের পরিবারবর্গের শোকা-বনত হৃদয় উত্তেজিত করিয়া বিদ্বেষভাবে পরিপুষ্ট করিতে লাগিল। একদিন কতিপয় কৈনুকা বংশীয় ইহুদি ইন্দ্রিয়-পরবশ হইয়া পল্লিগ্রামস্থ একজন দুষ্ক-বিক্রেত্রী কিশোরীর লজ্জাশীলতার ব্যাঘাত করিল। মোহাম্মদ ইহাতে উতাক্ত হইয়া তাহাদিগকে ইসলামধর্ম গ্রহণ করিতে অথবা মদিনা পরিত্যাগ করিয়া যাইতে আদেশ করিলেন। তাহারা মোহাম্মদের আদেশ অবহেলা করিয়া আপনাদের দুর্গ মধ্যে আশ্রয় গ্রহণ করিল। মোহাম্মদ সসৈন্তে তাহাদের দুর্গ পরিবেষ্টন করিলেন। পঞ্চদশ অহোরাত্রব্যাপী অবরোধের পর তাহারা তাঁহার হস্তে আত্মসমর্পণ করিল। তিনি তাহাদিগকে ক্ষমা করিলেন ; তাহারা (সাত শত) স্ব স্ব অস্ত্র-শস্ত্র মোসলমানের হস্তে পরিত্যাগ পূর্বক সিরিয়া রাজ্যে প্রস্থান করিল।

সাত শত ইহুদি মদিনা পরিত্যাগ করিলে মোসলমান-গণ একদল শত্রুর হস্ত হইতে রক্ষা প্রাপ্ত হইল। কিন্তু অনতিকাল মধ্যেই শত্রুর আর কতিপয় দল কার্যক্ষেত্রে অবতীর্ণ হইয়াছিল। ইহুদিদিগের মদিনা পরিত্যাগের

অব্যবহিত পরেই মোহাম্মদ সংবাদ পাইলেন যে, কর-
করতোল কদর নামক স্থানের কতিপয় লোক মোহাম্মদের
বিরুদ্ধে দলবদ্ধ হইয়াছে। এই সংবাদ শ্রবণ করিয়া দুই
শত মোসলমান সৈন্য যুদ্ধযাত্রা করে ; কিন্তু নির্দিষ্ট স্থানে
কোন শত্রু না দেখিয়া ফিরিয়া আইসে। মোহাম্মদ
নিজে এই সৈন্যদলের সঙ্গে ছিলেন। এই সময় সালবা ও
মহাতেল কুলের কতিপয় লোক দলবদ্ধ হইয়া মদিনার
প্রান্তে তক্ষররুত্তি আরম্ভ করে। এজন্য মোহাম্মদ
করকরতোল কদর হইতে প্রত্যাবৃত্ত হইয়া তাহাদের
বিরুদ্ধে সৈন্যসহ যাত্রা করেন। এবারও বিরুদ্ধবাদীদের
সঙ্গে মোসলমান সৈন্যের সাক্ষাৎ হয় নাই। এই অভিযানের
পর মোহাম্মদ তুরক্ষগামী একদল কোরেশ বণিককে
আক্রমণ করিবার উদ্দেশ্যে কতিপয় অশ্বরোহী সৈন্য
প্রেরণ করেন। বণিকদল মোসলমান সৈন্য দেখিয়া
পলায়ন করে। সৈন্যগণ পলায়িত বণিকদের পরিত্যক্ত
দ্রব্যাদি হস্তগত করিয়া মদিনায় প্রত্যাবৃত্ত হয়।

যুদ্ধ

এই তিনটি ক্ষুদ্র অভিযানের পর মোসলমানদিগকে প্রবল যুদ্ধে নিরত হইতে হইল। কোরেশেরা মোসলমান হস্তে ক্রমান্বয়ে দুই বার পরাজিত হইয়া কিছুকালের জন্য নীরব হইয়াছিল, কিন্তু মোহাম্মদকে ধ্বংস করিবার সঙ্কল্প পরিত্যাগ করে নাই। তৃতীয় হিজিরীতে তাহারা পুনরায় মোহাম্মদের বিরুদ্ধে যুদ্ধ ঘোষণা করিয়া তিন সহস্র সৈন্য সমভিব্যাহারে মদিনার অভিমুখে ধাবিত হইল। কোরেশ-বাহিনী দশম দিনে মদিনার অদূরবর্তী (৩ মাইল) ওহদ পর্বত শৃঙ্গে আসিয়া পঁহুছিল। মোহাম্মদ এক সহস্র মোসলমান সৈন্য লইয়া শত্রুর গতিরোধ করিতে আগমন করিলেন। ভীষণ যুদ্ধ আরম্ভ হইল। মোসলমানগণ শত্রু সৈন্যের অস্ত্রাঘাতে দলে দলে প্রাণ পরিত্যাগ করিতে লাগিল। স্বয়ং মোহাম্মদ গুরুতর আঘাত প্রাপ্ত হইলেন। বিজয়ন্ত্রী কোরেশদের অঙ্কশায়িনী হইলেন। কিন্তু এই বিজয়ন্ত্রী লাভ করিতে তাহাদের পক্ষেরও বহুসংখ্যক বীরপুরুষ প্রাণ বিসর্জন করিয়াছিল। ইহাতে কোরেশ সৈন্য দুর্বল হইয়া পড়ে। এজন্য তাহারা জয়লাভ

সত্বেও মদিনা আক্রমণের সঙ্কল্প পরিত্যাগ করিয়া মক্কায় প্রস্থান করিল।

কোরেশেরা মক্কায় প্রত্যাবৃত্ত হইয়া মদিনা আক্রমণের পূর্বে প্রতিনিবৃত্ত হওয়ার জন্য অনুশোচনা করিতে আরম্ভ করিল। এজন্য তাহারা অচিরে পুনরুৎসাহ যুদ্ধাযোজনে প্রস্তুত হইল। এই সংবাদ মদিনায় পৌঁছাইলে মোহাম্মদ মোসলমানের প্রতাপ প্রদর্শন করিয়া শত্রুকুলের মনে ভয় উৎপাদন পূর্বক তাহাদিগকে যুদ্ধ হইতে নিবৃত্ত করিতে মনন করিলেন। এই উদ্দেশ্যে তিনি সসৈন্যে মদিনা পরিত্যাগ করিয়া জমরাল আসাদ নামক স্থানে আসিয়া শিবির সংস্থাপন করিলেন। কোরেশেরা এই সংবাদ অবগত হইয়া স্তম্ভিত হইয়া পড়িল এবং সমস্ত যুদ্ধাযোজন পরিত্যাগ করিল। মোহাম্মদ সসৈন্যে মদিনায় ফিরিয়া গেলেন।

মোহাম্মদ বিনা রক্তপাতে ফিরিয়া আসিলেন, কিন্তু তাঁহাকে মদিনায় প্রত্যাবৃত্ত হইয়াই আবার যুদ্ধযাত্রা করিতে হইল। তলহা ও সালমা নামক দুইজন আরব অধিনেতা দলবদ্ধ হইয়া মদিনার পার্শ্ববর্তী স্থান সমূহ লুণ্ঠন করিতে উদ্যত হওয়াতে মোসলমান সৈন্য যুদ্ধযাত্রা করিল। শত্রুরা তাহাদিগকে দেখিয়া ঘর বাড়ী ছাড়িয়া

পলায়ন করে। মোসলমান সৈন্য তাহাদের সমস্ত সম্পত্তি হস্তগত করিয়া মদিনায় ফিরিয়া আইসে।

ইহার পর (হিজরী চতুর্থ অব্দে) মোহাম্মদ একদল ইহুদির বিরুদ্ধে অস্ত্র ধারণ করিতে কাধ্য হন। মদিনা হইতে চারিদিনের পথ দূরবর্তী নাজেদ নামক স্থানে ধর্ম প্রচার করিবার জন্য তৎস্থানের অধিনেতা আবুরা মোসলমানদিগকে আহ্বান করিলেন। তদনুসারে মোহাম্মদ সত্তর জন মোসলমানকে তথায় প্রেরণ করিলেন। তত্রত্য অধিবাসীরা প্রেরিত মোসলমানদিগকে আবুরার অজ্ঞাতনারে আক্রমণ করিল। সমস্ত মোসলমান নিহত হইল। কেবল আমরু নামক একজন মোসলমান দৈবাৎ প্রাণরক্ষা করিয়া মদিনার অভিমুখে যাত্রা করিলেন। আমরু পশ্চিমধ্যে মদিনা হইতে প্রত্যাগত দুইজন নাজেদ-অধিবাসীকে নিদ্রিত অবস্থায় দেখিতে পাইলেন, এবং প্রতিহিংসার বশবর্তী হইয়া তাহাদিগকে তদবস্থাতেই বধ করিলেন। অতঃপর তিনি মদিনায় প্রত্যাবর্তন করিয়া মোহাম্মদের নিকট সমস্ত অবস্থা জ্ঞাপন করিলেন। মহাপুরুষ মোসলমানদের শোচনীয় মৃত্যুতে একান্ত মর্ম্মাহত হইলেন। পশ্চিমধ্যে নিহত দুই ব্যক্তি তাঁহার নিকট অভয় প্রাপ্ত হইয়াছিল। এজন্য তিনি তাহাদের হত্যার জন্য

ক্ষতিপূরণ করিতে আদেশ করিলেন। নাজেদের অধিবাসীরা বনিজিরবংশীয় ইহুদিদের সঙ্গে সন্ধি-সূত্রে আবদ্ধ ছিল। মোহাম্মদ ইহাদের অধিনেতার যোগে ক্ষতিপূরণের অর্থ নিহত ব্যক্তিদের উত্তরাধিকারীদিগকে প্রদান করিবার অভিপ্রায়ে তাঁহার গৃহে গমন করিলেন। বনিজিরবংশীয়গণ আন্তরিক বিদ্বেষের বশবর্তী হইয়া এই সুযোগে মোহাম্মদকে হত্যা করিবার জন্য আয়োজনে প্ররত্ত হইল। মোহাম্মদ এই বিষয় গোপনে অবগত হইয়া তাহাদের গ্রাস হইতে উদ্ধার পাইলেন। তিনি গৃহে আগমন করিয়া তাহাদিগকে ইসলামধর্ম গ্রহণ অথবা মদিনা পরিত্যাগ করিতে আদেশ করিলেন। তাহারা এই আদেশ প্রতিপালনে অস্বীকৃত হইল। মোহাম্মদ তাহাদের ব্যবহারে উত্যক্ত হইয়া অস্ত্রধারণ করিলেন। কিয়ৎকাল প্রতিকূলাচরণের পর ইহুদিগণ ধন-প্রাণ রক্ষার অভিপ্রায়ে অস্ত্র-শস্ত্র মোসলমানের হস্তে অর্পণপূর্বক মদিনা পরিত্যাগ করিল।

বনিজিরবংশীয় ইহুদিরা নির্কাসিত হইবার পর আর একদল শত্রু উপস্থিত হইল। আলমার ও সালন কুলের লোকেরা মোহাম্মদের বিরুদ্ধে যুদ্ধ ঘোষণা করিয়া নৈশ্চ সংগ্রহ করিতে লাগিল। এজন্ত তাহাদিগকে দমন করিবার

জন্ম সৈন্য প্রেরিত হইল। কিন্তু তাহারা মোসলমান সৈন্তের আগমনে পলায়ন করিল। মোসলমান সৈন্য কাহারও রক্তপাত না করিয়া মদিনায় ফিরিয়া গেল।

ইহার অব্যবহিত পরেই মোহাম্মদ দোমতোলজন্দন নামক স্থানে সসৈন্যে গমন করিলেন। এইস্থানে খোন্স্মা ও যবের আমদানী হইত। তত্রত্য কতকগুলি দুষ্ট লোক দলবদ্ধ হইয়া বিদেশীয়দের প্রতি অত্যাচার করিতেছিল। মোহাম্মদ ইহাদিগকে দমন করিবার জন্যই সসৈন্যে গমন করেন। কিন্তু দুর্বৃত্তেরা তাঁহার আগমন সংবাদ শ্রবণ করিয়া পলায়ন করিল। মোহাম্মদ বিনাযুদ্ধে অভীষ্ট সিদ্ধ করিয়া মদিনায় প্রত্যাবর্তন করিলেন।

কিন্তু মোসলমান সৈন্যের একদিনের জন্যও বিশ্রাম ছিল না। প্রাপ্তান্ত অভিযানের অব্যবহিত পরেই (হিজরী পঞ্চম অব্দে) মোহাম্মদকে আবার অস্ত্রধারণ করিতে হইল; লোহিত সাগরের অনতিদূরে মন্তলকবংশীয়েরা কোরেশদের সঙ্গে সম্পর্কস্থিত এবং তাহাদের ন্যায় পৌত্তলিক ছিল। তাহারা পঞ্চম হিজরীতে মোহাম্মদের বিরুদ্ধে সংগ্রাম করিতে সমুত্তত হয়। মোহাম্মদ এই সংবাদ অবগত হইয়া সসৈন্তে তাহাদের আবাসভূমিতে উপনীত হইলেন। মন্তলকেরা মোসলমান সৈন্তের গতিরোধ জন্ম আগমন

করিল। উভয় সৈন্য পরস্পরের সম্মুখবর্তী হইলে ওমর উচ্চৈঃস্বরে বলিলেন, “ইসলামধর্ম গ্রহণ কর, তোমাদের জীবন ও ধনসম্পত্তি রক্ষা পাইবে।” তাহারা অস্বীকার করিল। তখন মোসলমান সৈন্য তাহাদিগকে আক্রমণ করিল, তাহাদের প্রবল আক্রমণে মস্তুলকেরা পরাজিত হইল। মোসলমান সৈন্য বিজয়োল্লাসে মদিনায় প্রত্যাবর্তন করিল।

মোহাম্মদ মস্তুলকের যুদ্ধ হইতে মদিনায় প্রত্যাবর্তন হইয়াই অভিনব বিপদে পতিত হইলেন। তাঁহার প্রতিগমনের অল্পদিন পরেই দশ সহস্র কোরেশ সৈন্য মদিনা বিধ্বস্ত করিবার জন্য মক্কা হইতে বহির্গত হইল। কুরেজা-বংশীয় ইহুদিরা তাহাদের সঙ্গে যোগ দিয়া মোহাম্মদের বিরুদ্ধে যুদ্ধ ঘোষণা করিল। মোহাম্মদ শত্রুর গতিরোধ জন্য তিন সহস্র সৈন্যসহ মদিনার অদূরবর্তী যানা পর্বতের পাদদেশে উপনীত হইলেন। শত্রু সৈন্য আসিয়া মোসলমান সৈন্যের সম্মুখে শিবির সংস্থাপন করিল। প্রথম দিনের যুদ্ধে আলী, ওমর নামক একজন কৃতান্ত সদৃশ প্রবলপরাক্রান্ত বীরপুরুষকে দ্বৈরথ যুদ্ধে হত্যা করিলেন। ক্রমাগত যুদ্ধ চলিতে লাগিল। এই যুদ্ধকালে নমির নামক একজন কোরেশ গোপনে ইসলামধর্ম গ্রহণ করিয়া

মোহাম্মদের শরণাগত হইল। তাহার চক্রান্তে কুরেজা ও কোরেশ সৈন্যদের মধ্যে ভেদ উপস্থিত হইয়া নানা-প্রকার গোলযোগের সৃষ্টি করিল। তাহারা ভীত হইয়া পড়িল। যুদ্ধস্থান পরিত্যাগের কল্পনা তাহাদের মনে উদ্ভিত হইল। তাহাদের ঈদৃশ মানসিক অবস্থার সময় দুরন্ত ঝটিকা উপস্থিত হইয়া তাহাদের সমস্ত শিবির বিশৃঙ্খল ও বিধ্বস্ত করিয়া ফেলিল। তাহারা এই ঘটনায় ভীতিবিহ্বল হইয়া পলায়ন করিল। যানা পর্বতের পাদদেশে মোসলমান সৈন্যকে এই ঝটিকার মধ্যে উনত্রিশ দিন অবস্থান করিতে হইয়াছিল। এই সময় মধ্যে দুরন্ত শীত এবং খাড়াভাব নিবন্ধন তাহাদের কষ্টের একশেষ হইয়াছিল। মোহাম্মদকে এই যুদ্ধে যেরূপ কষ্টভোগ ও পরিশ্রম করিতে হইয়াছিল, অন্য কোন যুদ্ধে সেরূপ হয় নাই।

মোহাম্মদ মদিনায় প্রত্যাবর্তন করিয়াই কুরেজা ইহুদিদের বাসস্থান অবরোধ করিলেন। তাহারা পঞ্চবিংশতি দিন ব্যাপি অবরোধের পর আত্মসমর্পণ পূর্বক জীবন ভিক্ষা করিয়া নির্কাসন দণ্ড প্রার্থনা করিল। মোহাম্মদ তাহাদের প্রার্থনা গ্রাহ্য করিলেন না; কিন্তু তাহারা তাহাতে নিরাশ না হইয়া পুনঃ পুনঃ কাকুতি মিনতি করিতে

লাগিল। অবশেষে মোহাম্মদ ইহুদিদের প্রার্থনা মত তাহাদের বিচারভার সাদ নামক একজন প্রধান শিষ্যের হস্তে অর্পণ করিলেন। সাদ ইহুদিদের বন্ধু বলিয়া খ্যাত ছিলেন। কিন্তু সাদের নৃশংস বিচারে পুরুষদিগের প্রাণদণ্ড এবং রমণী ও বালকদের দাসত্ব বিধান হইল। সাদ প্রাপ্তবয়স্ক যুদ্ধে অত্যন্ত আহত হন, এজন্যই তিনি কুরেজাদের প্রতি ক্রুদ্ধ হইয়া তাদৃশ কঠোর ব্যবস্থা করিয়াছিলেন বলিয়া ইতিহাস লেখকগণ উল্লেখ করিয়াছেন।

কুরেজা ইহুদিগণের হত্যার পর মোসলমান সৈন্য উপযুগ্যপরি পাঁচটি ক্ষুদ্র অভিযান করিয়াছিল। আমরা এই সকল অভিযানের সংক্ষিপ্ত বিবরণ প্রদান করিতেছি—

(১) সয়ফলকার অভিযান, কোন যুদ্ধ হয় নাই। (২) মদিনার নিকটবর্তী কোন স্থানের অধিবাসীরা দুই জন মোসলমানকে হত্যা করিয়াছিল। মোহাম্মদ তাহাদিগকে এই দুষ্কার্যের প্রতিফল দিবার জন্য সৈন্য প্রেরণ করেন। তাহাদের আগমনে অধিবাসীরা পলায়ন করে। মোসলমান সৈন্য বিনাযুদ্ধে মদিনায় প্রত্যাবর্ত্ত হয়। (৩) হজরত মোহাম্মদ খরবিয়া নামক স্থানে একদল সৈন্য প্রেরণ করেন। তাহারা কয়েকজন লোককে হত্যা করিয়া

হজরত মোহাম্মদ

মদিনায় প্রত্যাগমন করে । (৪) মোহাম্মদ ফদকের সাদবংশীয়দের বিরুদ্ধে মহাবীর আলীকে প্রেরণ করেন । আলী যুদ্ধে জয়লাভ করিয়া মদিনায় প্রত্যাবর্ত্ত হন । (৫) কতিপয় তস্কর মোহাম্মদের দুইটি উষ্ট্র অপহরণ করায় মদিনার বহির্ভাগে একটি যুদ্ধ হয় । তস্করেরা মোসলমান সৈন্তের অস্ত্রাঘাত সহ্য করিতে না পারিয়া পলায়ন করে ।

হোদয়বিয়ার সন্ধি

এই সময় মোহাম্মদ একবার জন্মভূমি মক্কা দর্শন করিবার জন্ত আগ্রহান্বিত হইলেন । তিনি পুণ্যমাসে (জেল্‌কদ মাসের প্রথম সোমবারে) ছয়শত মোসলমান সৈন্ত সমভিব্যাহারে নিরস্ত্র হইয়া মক্কাযাত্রা করিলেন । কোরেশেরা এই সংবাদ অবগত হইয়া তাঁহার গতিরোধ জন্ত সৈন্ত প্রেরণ করিল । মোহাম্মদ এইবার তাহাদের নিকট দূত প্রেরণ করিলেন । কোরেশেরা তাঁহার দূতকে অবজ্ঞাত করিয়া ফিরাইয়া দিল । নির্বিবাদে মক্কা দর্শন করিয়া মদিনায় প্রত্যাবর্ত্তন করাই মোহাম্মদের ইচ্ছা

ছিল। এ-কারণ তিনি পুনর্বার দূত প্রেরণ করিলেন। বহু আন্দোলনের পর দশ বৎসরের জন্ত সন্ধি স্থাপিত হইল; মোসলমান এবং কোরেশ, উভয়েই দশ বৎসরের জন্ত পরস্পরের বিরুদ্ধে অস্ত্রধারণে বিরত থাকিতে প্রতিশ্রুত হইল। মোহাম্মদ মক্কায় প্রবেশ ক্ষান্ত করিয়া প্রত্যাবর্তন করিতে স্বীকৃত হইলেন; কোরেশেরা পর বৎসর তাঁহাকে নশিযো কোষবদ্ধ তরবারি লইয়া তিন দিন মক্কায় বাপন করিতে দিতে অঙ্গীকার করিল। মোসলমানগণ মক্কায় আসিল। এই সন্ধির নাম হোদয়বিয়ার সন্ধি।

মোহাম্মদ মদিনায় ফিরিয়া আসিয়া খয়বারের ইহুদি-দের বিরুদ্ধে যুদ্ধযাত্রা করিলেন। খয়বারের ইহুদিরা অত্যন্ত পরাক্রমশালী ছিল। তাহারা মোসলমানদের উচ্ছেদসাধনার্থ যুদ্ধের আয়োজনে প্ররত্ত ছিল। মোহাম্মদ এজমতই তাহাদের বিরুদ্ধে যুদ্ধযাত্রা করেন। মোসলমান-গণ খয়বার আক্রমণ করিলে ইহুদিরা প্রবল পরাক্রমে যুদ্ধ করিতে লাগিল। কিন্তু আলীর নেতৃত্বে মোসলমান সৈন্য তাহাদিগকে পরাজিত করিয়া খয়বার অধিকার করিল। ইহার পর মোহাম্মদ ফদক এবং ওয়াদি-উল-করার ইহুদিদিগকে যুদ্ধে পরাজিত করিয়া মদিনায় প্রত্যাবর্তন করিলেন। (৭ হিজরী)।

হজরত মোহাম্মদ

মোহাম্মদ মদিনায় প্রত্যাবর্তন করিয়া হোদয়বিয়ার সন্ধির নির্দিষ্ট সময় মত দুই সহস্র শিষ্য সমভিব্যাহারে মক্কা গমন করিলেন। কোরেশেরা তাঁহার আগমনে মক্কা পরিত্যাগ করিয়া প্রস্থান করিল।

মোহাম্মদ জন্মভূমি দর্শন করিয়া তিন দিন পর মদিনায় যাত্রা করিলেন।

মোহাম্মদ মদিনায় প্রত্যাবৃত্ত হইয়াই যুদ্ধোত্তমে নিরত হইলেন। তিনি সিরিয়ার নিকটবর্তী মুতা নামক স্থানে ধর্মপ্রচার জন্ত দূত প্রেরণ করিয়াছিলেন। তত্রত্য খৃষ্টান অধিবাসীরা তাঁহাকে হত্যা করে। মোহাম্মদ এই হত্যার প্রতিশোধ লইবার জন্ত মদিনায় ফিরিয়া আসিয়া সৈন্ত প্রেরণ করিলেন। মোসলমান সৈন্ত মুতার সম্মুখবর্তী হইলে তত্রত্য অধিবাসীরা তাহাদিগকে আক্রমণ করিয়া অত্যন্ত বিব্রত করিয়া তুলিল। ক্রমান্বয়ে তিন জন মোসলমান সেনাপতি জীবন বিসর্জন করিলেন। শেষে বীরশ্রেষ্ঠ খালেদ সেনাপতির পদ গ্রহণপূর্বক প্রবল পরাক্রমে শত্রু-সৈন্ত নাশ করিয়া বিজয়পতাকা উড্ডীন করিলেন। (৮ম হিজরী।) অতঃপর মোসলমান সৈন্ত মদিনায় প্রত্যাবৃত্ত হইল।

কাবা মসজিদ একেশ্বরের উপাসনার প্রতিষ্ঠা

মৃত্যুর যুদ্ধের অল্পদিন পরেই কোরেশেরা সন্ধির নিয়ম ভঙ্গ করিয়া বনি খুজা বংশীয় মোসলমানদিগকে আক্রমণ করিল। তাহারা কোরেশদিগকে দমন করিবার জন্য মোহাম্মদের সাহায্য প্রার্থনা করিল। তিনি তাহাদের আস্থানে অবিলম্বে দ্বাদশ সহস্র সৈন্য সমভিব্যাহারে মক্কা অভিমুখে যাত্রা করিলেন। আবুসুফিয়ান এবং মোহাম্মদের পিতৃব্য আব্বাস প্রমুখ কোরেশ দলপতিগণ অগ্রসর হইয়া ইসলামধর্ম গ্রহণ করিলেন। মোহাম্মদ বিপুলবাহিনীসহ আগমন করায় এবং দলপতিগণ ইসলামধর্ম গ্রহণ করিয়া তাঁহার পক্ষাবলম্বী হওয়ায় কেহই আর তাঁহার গতিরোধ করিতে অগ্রসর হইল না। তিনি নগৌরবে মক্কায় প্রবেশ করিয়া কাবা মসজিদে তিন শত যাইটটি মূর্ত্তি ভগ্ন করিলেন। কোরেশেরা বিস্মিত লোচনে এই দৃশ্য দেখিতে লাগিল। অতঃপর মক্কার সমস্ত নরনারী মোহাম্মদের শরণাপন্ন হইয়া ইসলাম-ধর্ম গ্রহণ করিল ; মোহাম্মদ কিয়দ্দিবস মক্কায় বাস করিয়া মদিনায় প্রতিগমন করিলেন।

পৌত্তলিকতার ছুর্গন্ধরূপ কাবা মসজিদে একেশ্বরের উপাসনা প্রতিষ্ঠিত হইবার সঙ্গে সঙ্গেই ইসলাম-ধর্মের জ্যোতিঃ আরবদেশের সর্বত্র বিকীর্ণ হইয়া অজ্ঞান তিমিরাচ্ছন্ন নরনারীর হৃদয় আলোকিত করিল। আরবদেশে হইতে দেবদেবীর উপাসনা বিলুপ্ত হইল।

হওয়াজ্জন ও সকিফ ব্যতীত আরবের অন্য সমস্ত সম্প্রদায় ইসলাম-ধর্ম গ্রহণ করিয়া মোহাম্মদের শরণাপন্ন হইল; তাঁহার ঐশ্বর্য্য প্রভাব এবং প্রতিপত্তি সমধিক বৃদ্ধি প্রাপ্ত হইল। হওয়াজ্জন ও সকিফ বংশীয় অধিনেতৃগণ ত্রিশ সহস্র সৈন্য সংগ্রহ করিয়া মদিনা আক্রমণ করিবার জন্য বহির্গত হইল। মোহাম্মদ এই সংবাদ পাইয়া শত্রু সৈন্যের গতিরোধ করিতে সসৈন্যে যাত্রা করিলেন। হোলয়ন নামক স্থানে উভয় সৈন্য পরস্পরের সম্মুখীন হইলে তুমুল যুদ্ধ আরম্ভ হইল। মোসলমান সৈন্য শত্রুর প্রবল আক্রমণ সহ্য করিতে না পারিয়া পলায়ন করিতে আরম্ভ করিল। মোহাম্মদ ও আবুসুফিয়ান তাহাদিগকে উৎসাহিত করিতে লাগিলেন। সৈন্যগণ তাঁহাদিগের উৎসাহপূর্ণ বাক্যে উদ্বীণ হইয়া শত্রুদিগকে ছুর্জয় পরাক্রমে আক্রমণ করিল। শত্রুকুল তাহাদের পরাক্রম প্রতিরোধ করিতে না পারিয়া পৃষ্ঠ প্রদর্শন

করিল। বিজয়লক্ষ্মী মোসলমানের অক্ষশায়িনী হইলেন। শত্রু সৈন্তের ছয় সহস্র অশ্ব ও চারি সহস্র উষ্ট্র ও চারি সহস্র রৌপ্যমুদ্রা মোসলমানদের হস্তগত হইল। এক দল সক্ষিক হওয়াজন সৈন্ত রণক্ষেত্র হইতে পলায়ন করিয়া তায়েফ নগরে আশ্রয় গ্রহণ করিল। মোহাম্মদ তায়েফ নগর অবরোধ করিলেন। কিয়দ্বিস অতিবাহিত হইলে তত্রত্য অধিবাসীরা তাঁহার হস্তে আত্মসমর্পণ করিয়া ইসলাম-ধর্ম গ্রহণ করিল।

মোহাম্মদ তায়েফ নগর পরিত্যাগ করিয়া সগৌরবে মদিনায় ফিরিয়া আসিলেন। তিনি মদিনায় প্রতিগমন করিয়া অবগত হইলেন যে, রোমসম্রাট হিরাক্লিয়াস তাঁহার প্রতাপ খর্ব করিবার জন্য আরব নীমান্তে বহু সংখ্যক সৈন্ত সন্নিবিষ্ট করিয়াছেন। মোহাম্মদ তাহাদের বিনাশ সাধন উদ্দেশ্যে বিপুল যুদ্ধায়োজনে প্ররুত হইলেন। আবুবকর প্রভৃতি প্রচার বন্ধুগণ আপনাদের সঞ্চিত সমস্ত অর্থ মোসলমানজাতির রক্ষার জন্য উৎসর্গ করিলেন। মোসলমান রমণীগণ আপনাদের বসন ভূষণ বিক্রয় করিয়া লব্ধ অর্থ মোহাম্মদের হস্তে সমর্পণ করিল। মোহাম্মদ বিপুল বাহিনী সংগ্রহ করিয়া রোম সাম্রাজ্য আক্রমণ করিবার জন্য ধাবিত হইলেন। মোসলমান সৈন্ত

সিরিয়ার প্রান্তদেশে উপনীত হইল। এই সময় রোম-সম্রাট সাত্রাজ্যের আভ্যন্তরীণ বিশৃঙ্খলা দূর করিবার জন্ত সমস্ত শক্তি নিয়োগ করিয়াছিলেন। এজন্য তিনি মোসলমান সৈন্তের সম্মুখীন হইলেন না। মোহাম্মদ বিনা যুদ্ধে ফিরিয়া আসিলেন।

মোহাম্মদ মদিনায় প্রত্যাবর্তন করিয়া আরবদেশের মুশাসন ও আরবদেশের বহির্ভাগে ধর্মপ্রচার জন্ত মনোনিবেশ করিলেন। পার্শ্ববর্তী রাজ্য সমূহের রাজকুমারন্দ মোহাম্মদের সঙ্গে সখ্যস্থাপন জন্ত দূত প্রেরণ করিতে আরম্ভ করিলেন। মোহাম্মদ অবিশ্রাস্ত যুদ্ধ হইতে বিশ্রাম লাভ করিয়া পরমেশ্বরের ধ্যান ধারণায় নিরত হইলেন। কিন্তু তিনি দীর্ঘকাল শাস্তিতে বাপন করিতে পারিলেন না। তাঁহার একমাত্র পুত্র অকালে কাল-গ্রাসে পতিত হইল। মোহাম্মদ একমাত্র বংশধরের অকাল মৃত্যুতে শোকে অনুবিক্ত হইলেন। এই নিদারুণ শোকের সময়েও ধর্মবিশ্বাস তাঁহাকে পরিত্যাগ করিল না। তিনি প্রিয়তম পুত্রের সমাধির সময় আকুল কণ্ঠে বলিলেন, “হে পুত্র! আজ সাক্ষ্য প্রদান কর যে, ঈশ্বর তোমার প্রভু, পরগম্বর তোমার পিতা এবং ইসলাম তোমার ধর্ম।” তিনি ঈশ্বরের নাম স্মরণ করিয়া দুঃসহ

হজরত মোহাম্মদ

পুত্র-শোক সহ্য করিলেন। মোহাম্মদ মক্কা গমন করিতে ইচ্ছা করিলেন। তিনি দশম হিজিরীর জেলুকদ মাসে মক্কা যাত্রা করিলেন। যথাসময়ে জন্মভূমিতে উপনীত হইয়া সমস্ত ক্রিয়াকলাপ সমাপন করিলেন। তারপর সমাগত মোসলমানদিগকে মধুর ধর্মোপদেশ প্রদান করিয়া মদিনায় ফিরিয়া আনিলেন।

মোহাম্মদের তিরোধান

মোহাম্মদ মদিনায় প্রত্যাবর্তন করিয়া পীড়াক্রান্ত হইয়া পড়িলেন। ক্রমশঃ তাঁহার পীড়া অত্যন্ত বৃদ্ধিপ্রাপ্ত হইল। একাদশ হিজিরীর রবি-অল্-আউয়ল মাসের ৯ই তারিখ শুক্রবার আগত হইল। মোহাম্মদ চিরাগত প্রথামত মস্জিদে উপাসনার জন্ত গমন করিতে উদ্ভূত হইলেন, কিন্তু দৌর্য্যবশতঃ দুই এক পদ অগ্রসর হইয়াই মূর্চ্ছিত হইয়া পড়িলেন। তাঁহার পরিবর্তে আবুবকর মস্জিদে গমন করিয়া উপাসনা করিতে আরম্ভ করিলেন। ইহাতে সমবেত উপাসকগণ ক্ষুব্ধ হইয়া উঠিল, অনেকে অশ্রু বিসর্জন করিতে আরম্ভ করিল। মোহাম্মদ এই

সংবাদ পরিশ্রুত হইয়া আলী ও আব্বাসের স্বন্ধে ভর করিয়া মস্জিদে গমন করিলেন। আবুবকরের উপাসনা শেষ হইলে তিনি সমবেত মোসলমানদিগকে লক্ষ্য করিয়া বলিতে লাগিলেন, “তোমরা আমার মৃত্যুর জনরব শুনিয়া ভীত হইয়াছ। কিন্তু ইতিপূর্বে কি কোন পয়গম্বর চিরজীবী হইয়াছেন যে, আমিও মৃত্যুর হস্ত হইতে পরিত্রাণ লাভ করিয়া তোমাদের সঙ্গে চিরকাল বাস করিব? সকলি ঈশ্বরেচ্ছায় সম্পন্ন হয়; সকলেরি নিদিষ্ট সময় আছে, তাহার অগ্র পশ্চাৎ করা কাহারও সাধ্য নহে। যিনি আমাকে প্রেরণ করিয়াছেন, আমি তাঁহার নিকট ফিরিয়া যাইতেছি। তোমরা ঐক্যমুত্রে বদ্ধ থাকিও, পরস্পরকে প্রেম ও সম্মান করিও, বিপদের সময় একে অন্যের সাহায্য করিও, একে অন্যকে ধর্মবিস্থানে অটল থাকিতে ও সৎকার্য সাধন করিতে উৎসাহিত করিও। ধর্মবিস্থান এবং সৎকার্যই মানুষের মঙ্গল বিধান করিয়া থাকে। অন্য সকল কার্যই তাহাদিগকে ধ্বংসের পথে লইয়া যায়।”

মোহাম্মদ ধর্মোপদেশ প্রদান করিয়া গৃহে ফিরিয়া আসিলেন। ইহার তিন দিন পর তিনি “প্রভো! তোমার ইচ্ছা পূর্ণ হউক” বলিয়া চক্ষু মুদ্রিত করিলেন। তাঁহার

পবিত্র আত্মা নশ্বর দেহ পরিত্যাগ করিল। মহাপুরুষ আরবজাতির উদ্ধাম স্বভাব সংযত * এবং একেশ্বরবাদের পূর্ণ প্রতিষ্ঠা করিয়া আপন জীবনব্যত সাধনপূর্বক ইহ-লোক পরিত্যাগ করিলেন।

* আরবজাতির উদ্ধাম স্বভাব সংযত করিবার কিরূপ অসাধারণ ক্ষমতা মোহাম্মদের ছিল, তাহা প্রদর্শন করিবার জন্য আমরা একটি বিষয়ের উল্লেখ করিতেছি। তৎকালের আরবসমাজে সুরার অতিশয় প্রচলন ছিল। অতি মৃদু প্রকৃতির লোকও সহসা সুরাপান পরিত্যাগ করিতে পারে না। উগ্র প্রকৃতির আরবীয়দের পক্ষে পান-দোষ পরিত্যাগ করা একরূপ অসম্ভব ছিল। চতুর্থ হিজরীতে মোহাম্মদ সুরাপানের অবৈধতা বিষয়ে প্রত্যাদেশ লাভ করেন। এই প্রত্যাদেশের বিষয় ঘোষণা দ্বারা প্রচার করা হইয়াছিল। এই ঘোষণা প্রচারকালে যাহারা মদ্যপান করিতেছিল, তাহারা পানপাত্র দূরে ফেলিয়া দিল আর সুরা শীর্ষ করিল না। সুরাপায়ীরা সমস্ত ভাণ্ড তাজিয়া ফেলিল। পথে পথে সুরাত্রোত বহিল। এই ঘটনায় কেবল যে মোসলমানের উপর মোহাম্মদের প্রভাব প্রকাশ পাইতেছে, তাহা নহে, ইহাতে তাহাদের স্বগভীর সরল বিশ্বাসেরও প্রমাণ রহিয়াছে।

ইসলামের প্রতিষ্ঠার কারণ

মোহাম্মদ প্রথমতঃ ত্রয়োদশ বৎসর মক্কায় বাস করিয়া ইসলাম-ধর্ম প্রচার করেন। এই সময়ে তিনি স্বীয় পাবকশিখা সদৃশ উপদেশে কঠিন হৃদয় আরবদিগকে বিগলিত করিতে যত্ন করেন। তাঁহার ধর্মপ্রচারের ফলে মক্কার অনেকে ইসলাম-ধর্ম গ্রহণ করেন; এবং মক্কার বহির্ভাগেও কোন কোন স্থানে (মক্কার বহির্ভাগের স্থান সমূহের মধ্যে মদিনার নামই সর্বোপরি উল্লেখযোগ্য) ইসলাম-ধর্ম প্রতিষ্ঠিত হয়। কিন্তু সমগ্র আরবের লোকসংখ্যার তুলনায় ইসলাম-ধর্ম-বিশ্বাসীর সংখ্যা নগণ্য ছিল। মোহাম্মদ ত্রয়োদশ বৎসরের সাধনায়ও সাফল্যলাভ করিতে অসমর্থ হইয়া এবং বিরুদ্ধবাদী কোরেশদের উৎপীড়ন সহ্য করিতে না পারিয়া শিষ্যে মদিনায় আশ্রয় গ্রহণ করেন। মদিনার অনুরক্ত শিষ্যগণের সাহায্যে মোহাম্মদ ধর্মমণ্ডলীর প্রতিষ্ঠা করিয়া তাহাকে রাজশক্তি সম্পন্ন করিয়া তুলেন। এই ধর্মমণ্ডলীর সহায়তায় তিনি ইসলাম-ধর্ম প্রচারে ব্রতী হন। তাঁহার বলন্ত ধর্মোৎসাহ,

সর্বগ্রাহী সাম্যবাদ, * উদ্দীপনাপূর্ণ বাগ্মীতা, নিৰ্মল চরিত্র, বিপুল সাহস এবং সুদৃঢ় সহনশীলতার কথা ক্রমশঃ আরবদেশে পরিব্যাপ্ত হইয়া পড়ে ; এবং তজ্জন্ত আরব-দেশের নানা স্থান হইতে বহু লোক আকৃষ্ট হইয়া তাঁহার শিষ্যত্ব স্বীকার করে। এই ভাবে আরবদেশের সর্বত্র জ্ঞাতগতিতে ইসলামধর্মের প্রতিষ্ঠা আরম্ভ হয়। কিন্তু মোহাম্মদের জন্মভূমি মক্কার অধিবাসী কোরেশদের চিত্ত

* ইসলামধর্মের সাম্যবাদ বার্থ্যই সর্বগ্রাহী। মোসলমান মাজেই সমান। অতি নীচ মোসলমানেরও কোরাণ পাঠ ও মসজিদে উপাসনা করিবার অধিকার রহিয়াছে। রাজত্ব ও দাসত্বের মধ্যে কেবল গুণের পার্থক্য; অনেক ক্রীতদাস বুদ্ধি ও শৌর্যবলে রাজসিংহাসন অধিকার করিয়াছেন। দাসত্বপ্রথা ঈদৃশ সাম্যবাদের বিরোধী বলিয়া মোহাম্মদ তাহার পক্ষপাতী ছিলেন না। যে-সকল ব্যক্তি যুদ্ধে বন্দী হয়, কেবলমাত্র তাহাদিগকেই দাসত্বে আবদ্ধ করিবার নিয়ম তিনি অহমোদন করেন। কিন্তু দাসত্ব-মোচনই পরমেশ্বরের চক্ষে প্রীতিকর কার্য বলিয়া তিনি বর্ণনা করিয়াছেন। বন্দী ব্যতীত আর কাহাকেও দাসত্ব নিগড়ে আবদ্ধ করিতে মোহাম্মদ নিষেধ করিয়াছেন ; কিন্তু মোসলমানসমাজে আজ পর্যন্তও দাস বিক্রয়ের প্রথা প্রচলিত রহিয়াছে। এ-প্রথা যে ইসলামশাস্ত্রবিরুদ্ধ, তাহাঁতে সন্দেহ নাই।

উত্তরোত্তর অধিকতর বিদ্বেষ-বিষে পূর্ণ হইয়া উঠে। মোহাম্মদ পঞ্চ বৎসর মদিনায় অতিবাহিত করিয়া শশিষ্য মক্কা দর্শন জন্য গমন করেন। এই সময়ে তিনি কোরেশ-দের সঙ্গে সন্ধি সংস্থাপন করেন। এই সন্ধি ইতিহাসে হোদয়বিয়ার সন্ধি বলিয়া খ্যাত হইয়াছে। মোহাম্মদের সর্বশ্রেষ্ঠ প্রচার-বন্ধু আবুবকর বলিয়াছেন,—“হোদয়-বিয়ার সন্ধি স্থাপন জন্য ইসলামধর্মের যেরূপ প্রচার হয়, আর কিছুতে সেরূপ হয় নাই।” যে-সকল ইসলামধর্ম-বিশ্বাসী কোরেশদের হস্তে লাঞ্ছনার আশঙ্কায় আপনাদের ধর্ম-বিশ্বাস গোপন রাখিত, তাহারা হোদয়বিয়ার সন্ধিতে স্বাধীন ও প্রমুক্ত হইয়া প্রকাশ্যে ইসলামধর্মের শ্রেষ্ঠতা প্রতিপাদন করে। ইহাতে অসংখ্য নরনারীর কুসংস্কার দূর হয় ; এবং তাহারা ইসলামধর্ম গ্রহণ করে। হোদয়-বিয়ার সন্ধি স্থাপনের পর মোহাম্মদ মদিনায় প্রত্যাবর্তন করিয়া ধর্মপ্রচার করিবার জন্য পারস্তরাজ, রোমকসম্রাট, মিশরের শাসনকর্তা ও আবিসিনিয়ার অধিপতির নিকট দূত প্রেরণ করেন। ইহার ফলে এই সব দেশে ইসলাম-ধর্মের পক্ষপাতী কতিপয় ব্যক্তির উদ্ভব হয় এবং পারস্ত-রাজ্যের উপরিভাগ এয়মানের শাসনকর্তা প্রজামগলীসহ ইসলামধর্ম গ্রহণ করেন। হোদয়বিয়ার সন্ধি স্থাপনের

ইব্রাহিম মোহাম্মদ

এক বৎসর পর মোহাম্মদ পুনর্বার মক্কা দর্শন জন্য গমন করেন। এই সময়ে বহু লোক ইসলামধর্মে বিশ্বাস স্থাপন করে। ইহার পর বৎসর মোহাম্মদ মক্কার সমস্ত নরনারীকে ইসলামধর্মে দীক্ষিত করেন। মক্কার একেশ্বরবাদ পরিগৃহীত হইবার পর অচিরে সমগ্র আরবদেশে ইসলামধর্ম প্রতিষ্ঠা লাভ করে।

মোহাম্মদ মক্কায় শান্ত স্বভাব ছিলেন; বাক্যবলই তাঁহার একমাত্র সম্বল ছিল। কিন্তু তিনি মদিনায় তেজস্বিতা প্রকাশ করেন, বাহুবল তাঁহার সহায় হইয়াছিল। মক্কায় বাসকালে ইসলামধর্মের প্রতিষ্ঠা মন্দগতিতে হইয়াছিল, মদিনা গমনের পর হইতেই দ্রুতগতিতে ইসলামধর্মের প্রতিষ্ঠা আরম্ভ হয়। এ-কারণ অনেকে মনে করেন যে, মোহাম্মদ বাক্যবলে ধর্মপ্রচার করিতে অসমর্থ হইয়া বাহুবলের আশ্রয় গ্রহণ পূর্বক কৃতকার্য হন।

কি প্রণালীতে ইসলামধর্মের প্রতিষ্ঠা হয় তাহার রেখাপাত আমরা পূর্বেই করিয়াছি। মোহাম্মদের মদিনায় গমনের পর মোসলমান সৈন্য যতবার যুদ্ধযাত্রা করিয়াছিল, আমরা তাহার সংক্ষিপ্ত অথচ আমূল রূপান্তর প্রদান করিয়াছি। মোহাম্মদের আদেশে মোসলমান সৈন্য তেত্রিশবার যুদ্ধযাত্রা করিয়াছিল। তন্মধ্যে তেরবার কোরেশদিগের বিরুদ্ধে, ছয়বার ইহুদিদের বিরুদ্ধে, দুই-বার খৃষ্টানদের বিরুদ্ধে এবং বারবার বারটি বিভিন্ন সম্প্রদায়ের বিরুদ্ধে যুদ্ধযাত্রা করা হইয়াছিল। ইসলাম ও মোসলমানের বিরুদ্ধবাদীদের মধ্যে কোরেশদের শত্রুতাচরণই সর্বাপেক্ষা প্রবল ছিল। কোরেশদের নিম্নেই ইহুদিদের বিদ্বেষভাব প্রবল ছিল। কোরেশ ও ইহুদি ধরাপৃষ্ঠ হইতে ইসলাম ও মোসলমানদের চিহ্ন পর্য্যন্ত মুছিয়া ফেলিতে বদ্ধপরিকর হইয়াছিল। মোহাম্মদ ত্রয়োদশ বৎসর বাক্যবলে শত্রুতাচরণ নিরুত্ত করিতে যত্ন করেন। কিন্তু তাহাতে রূতকার্য্য হইতে না পারিয়া বাহুবলের প্রয়োগ করেন। মোহাম্মদ আত্মরক্ষা বা

শত্রুনাশ* করিবার উদ্দেশ্যেই অস্ত্রধারণ করিয়াছিলেন।
এজন্যই আমরা দেখিতে পাই যে, যাহার বিশেষভাবে

* কোন কোন লেখক লিখিয়া গিয়াছেন যে, লুঠনলোলুপ আরবদের প্রীতির জন্তই মোহাম্মদ অনেক স্থানে অস্ত্রধারণ করিয়াছিলেন। আমাদের ইহা বিশ্বাস করিতে প্রবৃত্তি হয় না। মোহাম্মদ নিজে নিরোঁভ মহাপুরুষ ছিলেন। আমরা গিরিশ-বাবুর গ্রন্থ অবলম্বন করিয়া একটি ঘটনার উল্লেখ করিতেছি। মোহাম্মদ অস্ত্রমকালে কতকগুলি স্বর্ণমুদ্রা প্রাপ্ত হন। তিনি নিজ কার্যের জন্ত ৬৭টি রাখিয়া অবশিষ্টগুলি বিতরণ করিবার জন্ত আয়েসার হস্তে অর্পণ করেন। ইহার কিছুকাল পরেই তিনি ব্যাধির যজ্ঞগায় সংজ্ঞাশূন্য হন। তিনি সংজ্ঞালাভ করিয়া মোহরগুলি বিতরণ করা হইয়াছে কি না, তাহাই প্রথমে জিজ্ঞাসা করেন। আয়েসা বলেন, বিতরণ করা হয় নাই। তিনি মোহরগুলি দরিদ্রদিগকে দান করিতে বলিয়া পুনর্ব্বার সংজ্ঞাশূন্য হন। মোহাম্মদ কিছুকাল পরে সংজ্ঞালাভ করিয়া মুদ্রাগুলি বিতরণ করা হইয়াছে কি না, পুনঃ জিজ্ঞাসা করেন। আয়েসা পূর্ব্বমত উত্তর দেন। ইহাতে মোহাম্মদ মোহরগুলি আলীর হাতে দেন। আলী বিতরণ করিলে তিনি বলেন, “এক্ষণে আমি শান্তি-লাভ করিলাম।” ঈদৃশ মহাপুরুষ যে শিষ্যগণের লুঠন বাসনা চরিতার্থ করিবার জন্ত নররক্তপাত করিতেন, তাহা আমাদের বিশ্বাস করিতে প্রবৃত্তি হয় না।

যত প্রবল ছিল, তাহার বিরুদ্ধে তত অধিকবার যুদ্ধযাত্রা করা হইয়াছিল। কিন্তু পনরবারের অধিক যুদ্ধ করিতে হয় নাই। মোসলমানগণ তেত্রিশবার যুদ্ধযাত্রা করিয়াছিল। তন্মধ্যে মোহাম্মদ পনরবার তাহাদের সহগামী ছিলেন। * বস্তুতঃ মোহাম্মদ বাহুবলের সাহায্যে ধর্মপ্রচার করেন নাই। তাঁহার অনুষ্ঠিত যুদ্ধের ফলে কদাচিৎ কেহ ইসলামধর্ম গ্রহণ করিয়াছিল। তবে একথা অবশ্য স্বীকার্য যে, শত্রুকুল যুদ্ধক্ষেত্রে পরাজয় নিবন্ধন দুর্বল হইয়া পড়াতে গৌণভাবে তরবারি ইসলাম-ধর্মের পথ পরিস্ফুট করিয়াছিল। একেশ্বরবাদের শ্রেষ্ঠতা

* মোহাম্মদের সময়ে মোসলমান সৈন্ত তেত্রিশবার যুদ্ধযাত্রা করিয়াছিল বলিয়া আমরা উল্লেখ করিয়াছি। কিন্তু এই সংখ্যা সম্বন্ধে মতভেদ দৃষ্ট হয়। সাদ-কাতির-ওয়া-কিদির (মুর সাহেবের মতে ইনি একজন বিশ্বাসযোগ্য ঐতিহাসিক) মতে একশত একবার যুদ্ধযাত্রা হইয়াছিল। জয়েদ-বিন-আকরমের মতে মাত্র উনিশবার যুদ্ধযাত্রা হইয়াছিল। কিন্তু আমরা নানা কারণে তেত্রিশ সংখ্যাই সর্বাপেক্ষা গ্রহণযোগ্য বলিয়া বিবেচনা করি। যুদ্ধযাত্রার সংখ্যা সম্বন্ধে মৌলভী চেরাগ আলী যাহা বলিয়াছেন, আমরা এখানে তাহা উদ্ধৃত করিতেছি :—The number of Mohammad's

এবং মোহাম্মদের গুণগ্রামই মুখ্যভাবে ইসলামধর্মের প্রতিষ্ঠার হেতু ছিল। আমরা একটি দৃষ্টান্ত প্রদর্শন করিতেছি। মোহাম্মদ শেষবার দ্বাদশ সহস্র সৈন্য সমভিব্যাহারে মক্কায় প্রবেশ করেন। তাঁহার বিপুল বাহিনীর নিকট কোরেশেরা মস্তক অবনত করিতে বাধ্য হয়, এবং শত্রুতাচরণ পরিত্যাগ করে। তিনি তরবারি দূরে নিক্ষেপ করিয়া প্রেম ও করুণা বিস্তার পূর্বক তাহাদিগকে ইসলামধর্মে দীক্ষিত করিয়াছিলেন। মোহাম্মদ বিজয়ী বীরের ন্যায় মক্কায় প্রবেশ করিলে অধিনেতৃবৃন্দ দণ্ডভয়ে ব্যাকুল চিত্তে তাঁহার নিকট আসিয়া দাঁড়াইয়াছিল। তিনি

expeditions has been unduly exaggerated, first by biographers, who noted down every expedition or warlike enterprise reported in the several authentic and unauthentic traditions long after their occurrences and did not at all trouble their heads by criticising them; and secondly, by giving all missions, deputations, embassies, pilgrims' journies, and merchantile enterpriess under the category of "Ghazavat" and "Saraya", lately construed by European writers as "plundering expeditions" or "a despatch of body of men with hostile intents."

হজরত মোহাম্মদ

তাহাদিগকে সম্বোধন করিয়া জিজ্ঞাসা করেন, “তোমরা কি ভাবিতেছ?” তাহারা উত্তর করে, “ক্ষমাশীল পিতার পুত্র, আপনি আমাদের উপর ক্ষমতা লাভ করিয়াছেন।” মোহাম্মদ প্রত্যুত্তরে বলেন, “পুরাকালে ইউসফ উৎপীড়নকারীদিগকে ক্ষমা করিয়া যাহা বলিয়া ছিলেন, অতঃ আমি তাহারই পুনরুক্তি করিতেছি। তোমাদিগকে তিরস্কার করিব না, ঈশ্বর পরম দয়ালু, তিনি তোমাদের সমস্ত অপরাধ মার্জনা করিবেন। তোমরা স্বাধীন, ইচ্ছা করিলে চলিয়া যাইতে পার।” মোহাম্মদের সৌজন্য ও সদ্যবহারে মুগ্ধ হইয়া সমস্ত মক্কাবাসী ইসলামধর্ম গ্রহণ করে।

মোহাম্মদ চরিত্র

মোহাম্মদের জীবন পরমেশ্বরের সেবা ও মানবজাতির কল্যাণের জন্য উৎসর্গীকৃত হইয়াছিল। এ-জীবনের আশ্রয় মধুময়। মোহাম্মদ আত্মীয়-স্বজনে স্নেহশীল ও বন্ধুবান্ধবে প্রীতিমান ছিলেন, তিনি দাসদাসীর সঙ্গে সাতিশয় সদ্যবহার করিতেন। তাঁহার তিরোভাবের

হজরত মোহাম্মদ

পর আনস নামক একজন ভৃত্য বলিয়াছিল, আমি দশ বৎসর কাল মহাপুরুষের অধীনে কাজ করিয়াছি ; তিনি একদিনের জন্তও আমাকে কটু কথা বলেন নাই । বালক-বালিকা তাঁহার অত্যন্ত প্রিয় ছিল, অনেক সময় তাঁহাকে পশ্চিমধ্যে দাঁড়াইয়া বালকবালিকাদিগকে আদর করিতে দেখা যাইত । তিনি জীবনে কাহাকেও কখন প্রহার করেন নাই । অভিসম্পাত বা কটুবাক্য একদিনের জন্তও তাঁহার রসনা কলুষিত করে নাই ।

মোহাম্মদ পীড়িতের সেবা করিতেন, শবাধার দেখিলেই বহন করিয়া সমাধি স্থানে লইয়া যাইতেন । ক্রীতদাসের গৃহে সানন্দে ভোজন করিতেন, স্বহস্তে জীর্ণবস্ত্র সংস্কার করিয়া পরিধান করিতেন, অনেক সময় স্বয়ং গাভী দোহন করিতেন । তিনি সৌজন্যের আধার ছিলেন । কাহারও সঙ্গে সাক্ষাৎকালে হস্ত মর্দন করিবার সময় তিনি কখনও প্রথমে হস্ত পরিত্যাগ করিতেন না । কেহই তাঁহার ন্যায় মুক্তহস্ত, বীরহৃদয় ও সত্যনিষ্ঠ ছিল না । তিনি আশ্রিতকে আশ্রয় দান করিতে সাতিশয় তৎপর ছিলেন । তিনি অত্যন্ত মিষ্টভাষী ও প্রিয়বাদী ছিলেন । “সত্যং ক্রয়াৎ, প্রিয়ং ক্রয়াৎ, মা ক্রয়াৎ সত্যমপ্রিয়ম্” এই নীতি তিনি অক্ষরে অক্ষরে প্রতিপালন করিতেন । তিনি

হজরত মোহাম্মদ

শোকার্তকে সান্ত্বনা ও দরিদ্রকে উৎসাহ প্রদান জন্ম অতি দীন হীন ব্যক্তির গৃহেও অকুণ্ঠিত চিন্তে গমন করিতেন। তাহাদের অনেকে তাঁহাকে পথিমধ্যে ধরিয়া আপনাদের দুঃখ কাহিনী নিবেদন করিত। এক-বার তিনি অনবসর বশতঃ একজন ধর্মজিজ্ঞাসু অন্ধকে প্রত্যাখ্যান করিয়াছিলেন। এ-কারণ তিনি আমরণ অনুশোচনা করিয়া গিয়াছেন। তিনি বলিতেন, আমি ধর্ম-জিজ্ঞাসু অন্ধকে প্রত্যাখ্যান করিয়া ঈশ্বরের অভিপ্রায়-বিরুদ্ধ কার্য করিয়াছি। গরীব দুঃখীর জন্ম তাঁহার দ্বার সর্বদা উন্মুক্ত থাকিত। অনেক গৃহ-হীন নিরাশ্রয় ব্যক্তি তাঁহার গৃহে রাত্রি যাপন করিত। তিনি আহারে প্রস্তুত হইবার প্রাক্কালে পরমেশ্বরের আশীর্বাদ ভিক্ষা ও আহারান্তে তাঁহার নিকট কৃতজ্ঞতা জ্ঞাপন করিতেন। তাঁহার জীবনে একদিনের জন্মও এ-নিয়মের ব্যত্যয় হয় নাই। তিনি প্রবল শত্রুকেও অকুণ্ঠিত চিন্তে ক্ষমা করিতেন।

মোহাম্মদ কোন প্রকার বিলাসিতার প্রশ্রয় দিতেন না। তাঁহার ভোজ্য ও পরিচ্ছদ অতি সামান্য ছিল। এক এক দিন তাঁহাকে অগ্নাভাবে অনাহারে থাকিতে হইত। অনেক সময় কেবলমাত্র খর্জুর ও জল তাঁহার

সুন্নিরূপে করিত। কোন কোন রাত্রিতে তৈলাভাবে তাঁহার গৃহে সন্ধ্যা-দীপ জ্বলিত না। মোসলমান ঐতিহাসিকগণ বলেন, পরমেশ্বর তাঁহার নিকট পৃথিবীর ধনভাণ্ডার খুলিয়া দিয়াছিলেন, কিন্তু তিনি তাহা প্রত্যাখ্যান করেন।

ফলতঃ আত্মপ্রতিষ্ঠা অথবা আত্মসুখ মোহাম্মদের জীবনের উদ্দেশ্য ছিল না। একমাত্র অদ্বিতীয় পরমেশ্বরের উপাসনার প্রতিষ্ঠা, পাপে আকণ্ঠ নিমজ্জিত আরব সমাজের উদ্ধার এবং বহুধা বিভক্ত আরবজাতির ঐক্যবন্ধন মোহাম্মদের প্রতিকার্যের মূলমন্ত্র ছিল। তাঁহার সফল জীবন; তিনি স্বীয় মূলমন্ত্রে সিদ্ধিলাভ করিয়াছিলেন। তাঁহার সাধনায় মূর্থতা ও কুসংস্কার-সমাচ্ছন্ন আরবদেশে সত্য ধর্মের রশ্মি বিকীর্ণ হইয়া পড়ে, সে-রশ্মির সম্পাতে আরবদেশের অন্ধকার দূরীভূত এবং তদেশবাসিগণ ধর্মে ও চরিত্রে সমুজ্জ্বল হইতে আরম্ভ করে। আরবগণ এক মহামন্ত্রে দীক্ষিত হইয়া নমস্তু বিবাদ বিসম্বাদ বিন্ধ্যত হয়, এবং ঐক্যবলে অসাধ্য সাধন করিতে আরম্ভ করে।



